

東
華
續
錄

東華續錄

咸豐十六

臣王先謙敬編

臣陶澐宣恭校

秋七月己酉朔諭內閣給事中袁甲三覆奏定郡王載銓廣收門生一摺據稱載銓曾繪息肩圖一卷題詠甚多凡屬門生皆係師生稱謂著載銓將所繪息肩圖卽行呈進○季芝昌因病賞假以

王懿德兼署閩浙總督

由福建巡撫署

○辛亥諭內閣徐廣縉奏勦辦波

山艇匪全股殲除一摺波山艇匪竄擾潯梧一帶人眾船多爲日已久茲經徐廣縉督飭高廉道沈棣輝參將劉開泰等帶領兩省兵勇於上下游合力夾攻三次獲勝該匪駛至蒼梧縣屬之戎墟江面參將崔大同候補知府郭超凡等管帶兵勇乘風迎擊奮勇爭先生擒賊匪二百三十二名擊斃及淹死者約計一千餘名此

股艇匪業已殲滅無遺該督徐廣縉調度有方深堪嘉尚著交部議敘仍飭上下游各州縣接查餘匪勿畱餘孽所有在事出力文武員弁著查明據實保奏候朕施恩○廣西巡撫勞崇光奏臣於六月初九日接據署馬平縣知縣李燦稟初二日有外來土匪千餘人在縣境四都大發一帶滋擾當卽飛調慶遠協官兵二百名融懷營官兵一百名並由省派員管帶川勇二百名兼程馳剿茲於六月十五日據代理柳州府知府羅福杲稟該匪糾集人數甚多勢益猖獗初十日夜直撲營盤官兵整隊出敵斃賊數百名因眾寡不敵署知縣李燦署守備舒曾謨力竭被害臣又由省城添派守備甘鍾棠千總萬明魁等帶兵千六百名奮勇勦洗務將此股悉數埽除陣亡之李燦舒曾謨請交部從優議卹 上諭廣西馬平縣土匪攜帶礮械在縣境四都大發一帶地方滋擾經該署

知縣李燦會同營員帶領兵勇往剿在喇堡地方力竭被害此股土匪突起滋擾拒捕戕官殊堪髮指著徐廣縉勞崇光督飭派往員弁並地方文武各員合力剿洗務將戕官各犯按名拏獲匪黨悉數殲擒所有陣亡之署馬平縣事准補修仁縣知縣李燦署左江鎮右營守備事中營千總舒曾謨均著交部從優議卹其見無下落各員弁及傷亡兵勇均著確查覆辦○諭軍機大臣等前有旨令陸建瀛楊文定督同臬司倪良燿將浙省漕糧設法催趲妥辦本日據椿壽奏浙漕礙難海運見擬籌辦變價等語本年浙江幫船開兌已遲且據稱杭嘉湖三府米多價賤銷售恐形壅滯如以賤價變糶致使正供漕糧竟同虛擲辦理亦未妥善見在江安等幫業已渡黃催趲前進浙江漕船諒亦跟蹤北上仍著陸建瀛楊文定會同椿壽督飭江蘇臬司倪良燿體察情形如運河照常

行走卽行迅速提催不准逗遛觀望儻須變通辦理或行海運或議變糶均著通盤籌畫迅定章程奏明妥辦總期漕糧不致折耗毋得藉詞推諉再有貽誤將此諭知陸建瀛楊文定椿壽並傳諭倪良燿知之○徐廣縉奏賊匪踞道州於六月初八日匪夥二千餘人忽入江華縣境勢將南竄查江華與廣東之連州陽山廣西之富川賀縣毗連而賀縣地面無重兵防堵尤爲可慮見先將臣隨營潮勇千名委員帶往駐守所有前派往潯州兵勇已飛飭高廉道沈隸輝督帶迅來梧州酌量撥往富賀兵力稍厚庶可不致疏虞廣西一省糜爛已久伏戎徧地又有散遣各處壯勇沿途滋擾惟有設法次第剪除以冀肅清邊圉 上諭徐廣縉奏道州逆匪於六月初八日分夥二千餘人入湖南江華縣境該縣與廣東之連州陽山廣西之富川賀縣俱相毗連先據該督咨廣東提督

崑壽在陽山連州一帶防堵並調集船隻嚴紮封川江口遏匪下
竄之路是廣東籌防尙屬周密至廣西之富川賀縣距江華甚近
防堵尤關緊要該督先經派委員弁管帶潮勇一千名扼要駐守
見復飛飭高廉道沈棣輝迅赴梧州酌撥兵勇前往嚴防見在波
山艇匪雖已剪除而土匪尙未淨盡且江華股匪意圖南竄必須
迅速堵剿先其所急著徐廣縉會同勞崇光向榮卽飭令得勝將
弁兵勇前往富賀一帶遏賊回竄之路或乘勢直抵江華縣境與
湖南將弁腹背夾攻殲除竄匪則道州逆匪亦必聞而膽落想該
督等通籌全局不至顧此失彼其廣西游匪土匪與散遣兵勇沿
途滋擾均宜次第剿捕著徐廣縉等飭令各府屬督同練勇迅速
掃除總期邊圉肅清不留餘孽將此由六百里諭知徐廣縉勞崇
光並諭令向榮知之○諭徐廣縉奏道州逆匪分竄江華縣境等

語湖南道州西南各路先經賽尙阿奏明分派劉長清王家琳鄧紹良等各帶重兵分扼要隘堵剿而鄧紹良由甯遠進紮水南統帶兵勇三千七百餘名兵力亦非單弱應與和春合力圍剿俾該逆坐困孤城剋期授首乃據徐廣縉奏稱六月初八日該逆分夥二千餘人已入江華縣境勢將南竄其如何突圍出走情形未據該大臣等馳奏朕心懸念實深江華與廣西富川賀縣接界一經竄回賊餒必將復熾本日已諭知徐廣縉派員馳赴該處防堵第廣西兵勇多已調赴湖南惟有截其南竄之路分飭諸軍與粵省兵勇合力夾擊令首尾不能相顧或可得手至該匪大隊是否尙踞道州既有竄逸之眾難保其不四出衝突窺伺衡湘是東北各路尤爲緊要孫應照鎮守甯遠如不得力該大臣等卽隨時酌度情形密籌援應萬不可稍有疏虞致衡永兩郡繹騷震驚也前據

該大臣奏我軍四面據河以守該逆不能竄越較永安地面圍守較易何以該匪分竄江華是否見在布置尙未周而著該大臣與該督督飭各路帶兵大員嚴密圍堵設法攻剿迅速籌辦慎勿裹糧坐甲再失機宜將此由六百里各諭令知之○壬子諭內閣昨據袁甲三參載銓恆春書元各款業經各自具摺回奏科道各官例得風聞言事然事有確據朕必嚴辦若以無據之談或暗受指使任意污毀其居心更不可問矣卽如所參書元於朝會之地每見載銓必疾趨請安訥爾經額於差次向載銓雙膝請安及書元在刑部負氣爭辨併有帶刀入署保奏文秀等語是否該給事中目見抑係聞自何人事關大員名節若非確實查辦何以折服其心著袁甲三將傳自何人一一明白回奏無論堂司官俱應指實不准稍有不實不盡其餘所陳各款如果確有憑據著一併回奏

○諭本日書元明白回奏一摺未將赴載銓府第與恆春相遇一節敘及至召見奏對之言何以向外人漏洩著一併再行明白回奏○裁貴州綠營逾額兵三千九百九十二名○癸丑諭內閣本日袁甲三明白回奏一摺據稱訥爾經額於差次向載銓雙膝請安一節係聞之御史端昌云其弟彥昌所目覩又書元收受文秀銀兩一節係聞自前署刑部侍郎曾國藩前任刑部郎中吳廷棟見任刑部郎中吳德清等語著派大學士裕誠會同軍機大臣傳到該員等查詢具奏除曾國藩見出試差外著直隸總督飭令吳廷棟迅即來京聽候查詢○賽尙阿程喬采奏臣賽尙阿於六月初一日馳抵永州體察地勢賊情知賊自竄越楚境各處土匪響應者轉較粵西爲多道州四面賊踞而州城附近地皆平坦我軍圍剿難周一俟抽調新兵陸續到來兵力加厚然後可以銳力圍

攻道州四達之衝東北面係通衡永正路和春等大營兵力稍厚前已分出兵勇二千餘名交劉長清會合所帶粵兵提勇等專紮西路見又分出楚滇兵提勇等六千餘名交常祿帶領與鄧紹良等兵勇由甯遠進紮南路初八日突出千餘由岑江渡竄走係往江華之路和春當卽會督鎮將派兵出隊於五里亭一帶施放槍礮該逆出巢迎敵與我兵相持甚久始復退回又據江華縣逃出弁兵人等報稱初八日逆匪分股詐稱潮勇闖入江華縣城約數百人城內僅有永綏防兵及壯勇三百名永州鎮標遊擊秦武林永綏協千總王士凱督同弁兵急開槍礮迎敵秦武林左腳爲賊矛傷江華縣知縣劉興桓被害室妾同時自盡等語臣等查永密切近江華刻下情形危急當由臣賽尙阿飭和春派劉長清帶兵勇馳由永明赴江華援剿並於永明畱兵數百以固城守見據

和春稟覆劉長清已奉飭前往且派定南路兵勇由常祿統帶於本月十一日移營由白馬渡河分兵三路進攻並於五里亭樹林內設伏以爲後應和春督率兵勇先開槍礮誘賊出巢該逆旋出二三千人分兩路撲來總兵經文岱李瑞秦定三王錦繡候補同知直隸州江忠源各帶兵勇亦分兩路迎擊和春居中調度槍礮連環進擊各路兵勇合力夾攻該逆敗走常祿等所帶兵勇卽於是日移營南路十四日和春仍分成出隊先於五里亭開礮誘賊該逆伏匿不出我兵漸偪漸近槍礮齊發斃賊多名該逆擁出千餘人我兵奮力壓下又斃賊數十名等語臣等查道州四路紛歧我兵不敷攻剿而該逆乘虛竄由西路徑撲江華句連土匪以致縣城失陷臣賽尙阿程喬采均未能先事豫防臣駱秉章亦有地方之責均請旨交部議處江華縣知縣劉興桓於縣城失陷臨難

捐軀深堪嘉憫應俟將在城官弁查明一併奏請恩卹其遊擊秦武林以拒賊身受重傷是否屬實已飭由江藍廳同知就近查驗並確查該員有無臨陣退避及藉詞遁出各情報明辦理仍一面檄催江西河南陝西四川各省續調新兵星速前進庶幾兵力厚集得以迅速蕲功又奏據永明縣知縣常連稟本月十三日夜賊千餘由江華道州兩路直撲永明縣城失守劉長清隨帶兵勇往紮富川縣交界臣等查江華失守後永明情形危急專委該革鎮劉長清帶兵由永明前往援剿原以兼顧該縣城守該革鎮帶兵行抵該縣地方已聞城池被陷卽當乘勢進攻以圖克復乃繞赴鄰縣地方坐視城池失守轉於遠處紮營實屬畏葸無能相應請旨將已革總兵劉長清拏問飭解永州嚴訊辦理臣賽尙阿督領全師調度失宜應請旨交部議處提督銜總兵和春北路堵剿未

能先事妥籌應請旨一併交部議處見已派弁持令嚴催劉長清所統副將明安泰遊擊蕭逢春都司米興朝等管帶川粵湖南官兵迅速前赴江永一帶剿匪總兵馬龍見在廣西省城業經臣賽尙阿飛札調由恭城取道永明接統劉長清兵勇俾資進剿並可堵截逆匪分竄之路刻下逆匪大夥尙在道州城內仍嚴飭和春常祿等極力攻剿至永明縣常連所稟劉長清種種引避情節如果屬實必當從嚴懲辦惟該令常連係守土之官是否藉詞請兵擅離城守亦須確切查訊應請將常連一併革職拏問俟劉長清解到提同質審明確按律定擬 上諭賽尙阿程喬采奏道州賊匪分股勾結土匪竄入江華縣城一摺又另片奏賊匪復撲永明縣城失守等語該匪於旬日之間連陷兩城殊堪髮指地方文武何以毫無準備帶兵大員何以不急籌援救且江華失守後劉長

清帶兵已抵永明正當乘勢進攻乃繞赴遠處紮營實出情理之外已革總兵劉長清著卽拏問永明縣知縣常連係守土之官輒以請兵爲辭擅離職守著一併革職拏問交賽尙阿程喬采嚴訊定擬具奏賽尙阿程喬采駱秉章和春著一併交部議處該大臣等見已札調總兵馬龍帶兵由恭城取道永明並派副將明安泰等帶領川粵各兵前赴江永一帶進剿著卽嚴飭各鎮將奮勇攻擊迅圖克復勿令賊匪再有蔓延○諭軍機大臣等賽尙阿程喬采奏賊匪分股肆擾江華永明二縣先後失守摺片各一件逆匪踞道州以來各處土匪多爲勾結見旣分股撲入江華永明二縣勢必四出衝突其南竄廣西之路固應嚴防而北路衡永一帶尤關緊要儻稍有疏虞致該匪乘間竄越剿辦更覺費手著賽尙阿程喬采督飭帶兵各員於水陸要隘沿途層層布置嚴密堵截毋

稍大意提督向榮前已有旨飭令任事如永州一帶見在情形緊急有須該提督帶兵協剿之處著賽尙阿酌量札調廣西提督印務卽知會徐廣縉派員署理其潮勇與鄉民互鬪致將委員李春華傷斃並著會同駱秉章嚴行查究所有續調各省官兵著卽飛催來楚軍餉已飭部籌備俟解餉過境時仍遵前旨遴派弁兵妥慎防護又據賽尙阿奏粵西剿捕事宜難以兼顧一摺廣西軍務前已諭令徐廣縉勞崇光會同商辦以專委任所有賽尙阿經手未完各事及歷次保奏未經查覆者均著徐廣縉勞崇光詳細確查奏明分別辦理其有交涉楚粵兩省事務仍隨時互相知照以免歧誤將此由六百里諭令知之○予湖南江華守城殉難知縣劉興桓祭葬世職○調福建兵三千名赴湖南剿賊○疏濬西陵河道溝渠○乙卯諭內閣陸建瀛奏請截留江廣尾幫漕米備

賑並催趲幫船北上等語本年湖南省起運漕米十二萬六千四百餘石尙未行抵江甯著卽照數截畱作爲江南賑需其不敷之處著於江西尾幫內截畱山東賑米著於江西最後各幫內照數截畱應在何處交卸著該督撫轉飭各該藩司酌定交該糧道等遵辦見在江西省幫船已經渡黃者六百九十九隻其在前各幫並著嚴催跟接首進之江安湖北各幫連檣北上毋得藉口截畱米石及運道艱滯任意耽延致干重咎至已經渡黃之銅鉛船隻亦卽催令插檔隨漕北上以免起卸之煩○丙辰諭內閣椿壽奏擒獲鄞縣梟徒首要各犯地方安謐一摺據稱鄞縣梟徒以俞能貴爲主謀首惡與張潮清狼狽爲奸又有該犯族人俞武相爲羽翼經該署撫督飭司道派令署甯波府知府畢承昭署鄞縣知縣段光清等先將張潮清拏獲俞能貴俞武相並夥黨一百餘犯仍

潛伏石山街經該府縣委員營弁督帶兵勇會合東鄉紳民團練馳往圍拏搜獲俞武相及俞能貴張潮清等犯家屬起獲器械六十八件六月十一日探知俞能貴在奉化焦坑地方廟內潛匿該府縣立即會同委員營弁帶兵往拏當將俞能貴擒獲地方一律安謐辦理尙爲妥速該梟匪等糾眾戕官實屬罪大惡極著該署撫卽將首要各犯提省嚴行審訊盡法懲辦以伸國法而儆刁頑在逃各犯仍飭該府縣督率紳民悉數緝獲毋畱餘孽○諭軍機大臣等據給事中袁甲三奏訥爾經額本年二月於隨扈之次行宮門口趨見載銓雙膝請安等語是否實有其事著訥爾經額據實明白回奏將此諭令知之○以福建疏縱官犯脫逃應奏不奏革前任總督劉韻珂巡撫徐繼畲職總督季芝昌等降級畱任○丁巳諭內閣龔裕奏公安縣地方被水較重見飭勦辦一摺另片

奏大冶等州縣被水情形本年湖北省荆江泛漲公安縣地方疊被淹浸又因上游支隄漫潰水勢驟漲高過縣城所築子埝搶護不及將縣城西南角漫缺衙署監倉均被淹沒覽奏實深軫念見經龔裕飭令該管知府就近確勘著卽迅速查明被災情形動用司庫銀兩妥爲安撫其被水較輕之大冶等十四州縣乏食貧民一併查勘撫恤毋令一夫失所所有被水各州縣如何設法疏消本年應徵錢糧應行分別緩徵均著確查具奏仍查明公安江陵潛江等縣隄工是否因漫致潰據實參奏○己未諭內閣兵部奏請將八旗及各省駐防官員告休定例改歸畫一等語定例綠營官員凡遇軍政之年不准告病乞休八旗則例雖無專條向俱照綠營辦理惟各省駐防多有臨考告休仍請食俸者辦理殊未畫一嗣後各省駐防旗員均著與在京八旗按照綠營定例如有於

軍政之年告病乞休者卽行勒令休致其出兵受傷非在三處以上亦不得題請給俸以杜規避而免歧異該部卽纂入則例永遠遵行○徐廣縉葉名琛奏羅境逆匪凌十八負隅抗拒六月初一初二等日經總兵福興等派隊進剿計斃匪夥十五名生擒九十五名嗣探得逆匪之弟凌三十八住宿鬼子埕礮臺時值四更卽令嚮導先行兵勇一路隨入徑登礮臺擒斬二名凌三十八受傷敗走福興等於初八日夜復遣兵勇帶同眼綫齊抵該處將全軍分作三層共爲十五隊星羅碁布宗元醇進南門彭舒萼吳昌壽進駐椽子山李敦業進駐石皮灣天將黎明卽分東西中三路齊撲入墟我軍勇氣百倍都司姚麟督帶外委戴文英等由岡頭寨至鬼子埕攻破礮臺七座放火焚燒首先入墟該逆凌十八跳入塘內渡水逃奔勇目馮日坤等越過短牆乘勢將凌逆首級砍落

戴文英等生擒造言煽惑商同謀逆之犯婦陳葉氏一名焚燒榕樹根等處礮臺二座凌三十八由礮眼突出經兵勇割取首級候選千總孔繼堯等力闢險要各隘直擣中堅焚燒礮臺十二座斬擒甚眾各營弁兵繼入西墟生擒逆犯之父凌五超一名分路進攻破壁直入擒殺無算東路派委都司黃曜吉等率同壯勇攻破東墟口外礮臺首先入墟賊之頭目凌十三張城憇黃非滙彭位篙羅萬勝張純詳黃明受莫汝篙李汶盛葉林生梁起安一併生擒自丑至午東西兩路生擒匪犯二百六十八名呈驗首級一百六十七顆殲斃一千一百餘名焚斃屍身八百餘具奪獲槍礮器械無數查凌十八自道光二十九年廣西金田拜上帝會往來信宜蹤迹靡定係著名會匪與洪秀泉等同惡相濟擾及兩省荼毒良善此股既除縱有不逞之徒皆已膽寒骨慄至總兵福興親

臨督陣正值風雨交加之會躍馬直入賊巢墜地墊傷仍復力疾前進洵屬謀勇兼施所有在事文武尙各著有微勞容臣等查明保奏至各會匪起於金田迨分股竄出後其勢已成力不能制經過各該州縣尙能嬰城固守力保無虞及至大兵雲集復又協同堵剿所有該管地方文武功過似可准其相抵請免置議 上諭徐廣縉葉名琛奏剿辦羅境逆匪擒斬首逆全股蕩平一摺覽奏深慰朕懷此股匪徒與洪秀泉會匪聲勢相倚擾及兩省抗拒一年之久實屬罪大惡極經該督撫等先後籌剿不遺餘力得以掃數殲擒洵足伸國法而快人心所有在事出力各文武首尾一年前後幾及百戰殲擒六千有奇皆能同心協力滅此兇頑洵屬著有勞績著卽確切查明據實保奏候朕施恩至該匪起自粵西竄入東省各州縣尙能保守城池又復協同堵剿該管地方文武各

官功過尙足相抵著免其置議○諭春熙奏夷匪竄擾卡倫見已堵逐出卡一摺此次夷匪竄擾卡倫雖經援兵當時擊退該守卡官弁不能先期警備以致焚燒房屋傷斃官兵均有應得之咎守備崔萬清把總馬鈞著與失於防範之副將恆安一併交部分別議處春熙著交部議處所有被傷陣亡之兵丁著該大臣查明咨部請卹○諭軍機大臣等本日據春熙奏夷匪鐵完庫里霍卓於六月初六日竄擾烏什畢底爾卡倫經春熙先後派委本城駐防副將恆安守備崔萬清把總馬鈞等帶領兵丁並飭伯克帶領回兵分別堵捕賊匪先因守卡弁兵睡熟偷進卡倫乘風縱火焚燒卡房傷斃官兵旋經援兵接應賊始退出等語見在該匪是否遠遁抑仍在卡外游奕內地回眾是否不至被其煽惑勾引著布彥泰於行抵葉爾羌時與德齡嚴密偵探賊眾多寡並賊首鐵完庫

里究係何處回子何以有霍卓名目查明具奏春熙另片奏擬請酌派葉爾羌官兵等語著德齡卽選派精兵先後密咨該城以便調用仍著布彥泰酌量情形密偵嚴防務期弭患未然不可稍涉張皇原摺片著鈔給閱看將此由五百里諭令知之○諭扎拉芬奏奏請酌減文武官員養廉一摺朕思邊疆重地該大臣等歲支養廉一經裁減儻將來不敷辦公轉得有所藉口致滋流弊所請酌減養廉之處著不准行至各省督撫提鎮等官養廉俱係辦公要需若驟議裁減亦屬有名無實著無庸議將此諭令知之○以勦平羅境逆匪加總督徐廣縉太子太保巡撫葉名琛總督銜賞總兵官福興巴圖魯名號○庚申諭軍機大臣等昨據徐廣縉葉名琛奏勦辦羅境逆匪全股蕩平見在道州逆匪分竄江華永明賊勢日熾所有羅境軍營弁兵除應酌畱若干按查餘匪外著徐

廣縉葉名琛迅卽選派得力將弁管帶該處獲勝之兵勇馳往湖南軍營協同圍剿可期得力總兵福興能否飭令統兵前往並著酌量派委仍咨明欽差大臣賽尙阿湖廣總督程喬采查照調遣其經由路徑或從廣東徑赴湖南或從粵西間道馳赴兵貴神速想該督撫定能妥籌辦理也將此由六百里諭令知之○以萬青黎爲禮部右侍郎由內閣學士遷○貸湖南臨武營兵丁倉穀○辛酉賽尙阿程喬采奏六月十五十六至二十三日常祿和春等由五里亭龍安礮兩家鋪節節進剿斃賊無數二十五日和春督率兵勇並約西南兩路進攻道州北路直逼賊營賊仍不出官軍分三路環攻忽於二十五日夜三更賊由州城乘夜竄由四眼橋小路全數遁逃查四眼橋係道州至甯遠藍山之路並可通永州郡城和春刻卽拔營進剿知會常祿立即帶兵前截後追並派鄧紹

良瞿騰龍等兵勇星馳繞赴四眼橋前路並護甯遠縣城旋據總兵孫應照甯遠縣知縣劉如玉等稟賊由四眼橋竄至該縣之水打鋪鄧紹良兵勇趕至天堂墟賊不敢近偏縣城竄往下灌和春帶兵追賊至司馬星地方仍卽拔營前進一路擒獲賊匪數十名立卽訊明斬首又據探報永明縣逆匪業已遁走江華賊匪亦回至水南兩縣城賊無多和春已札催明安泰虎嵩林等督帶兵勇速赴該兩縣相機收復此次和春及鄧紹良瞿騰龍等追兵尙屬迅速賊已不敢窺伺甯遠徑由水打鋪前竄下灌地方屯紮查下灌路通嘉禾藍山賊蹤見在游弋靡常各路均須備禦臣賽尙阿飛札鄧紹良瞿騰龍等迅由甯遠馳赴嘉禾明安泰軍迅由江華馳赴藍山兩處堵剿賊如再從兩縣越過則郴桂所屬及常甯新田各皆喫緊亦飭該將等隨時探明繞前堵截臣賽尙阿見駐永

州府城程喬采見在衡州足資鎮壓該處爲通省咽喉地方尤爲緊要擬將續調新兵暫畱以振軍威隨時探聽賊蹤指撥防剿查此次賊之分股由江永遁歸道州實係和春常祿南北兩路進剿嚴緊賊勢難支始由小路全股鋌竄惟七里江四眼橋係屬南路應由常祿分兵駐守賊旣由此夜竄臣等未便因其疊獲勝仗稍事姑容相應請旨將總兵常祿交部議處上諭內閣逆匪竄踞道州我兵四面攻剿自六月十五日以後總兵常祿等疊次攻擊連獲勝仗賊勢不支遂於二十五日夜逃出州城由四眼橋小路全數遁逸其永明江華賊股亦於二十三四五日棄城遁去回至水南欲圖併力奔竄我軍追捕迅速該逆不敢窺伺甯遠徑由水打鋪竄往下灌屯聚游弋賽尙阿見已札飭鄧紹良瞿騰龍等分路堵剿郴桂一帶亦飭一律堵截著賽尙阿等嚴督將士及各地

方文武員弁合力兜剿一路殲擒毋得再任擾竄城池致滋勾結
此次賊由小路竄出係屬總兵常祿分兵駐守之所咎實難辭常
祿著交部議處○諭軍機大臣等賽尙阿等奏連獲勝仗逆匪全
股逃竄見在嚴督追剿一摺布置尙爲周妥惟賊蹤靡定詭譎異
常難保不再從嘉禾藍山越過東窺郴桂等屬及常甯新田等處
爲北竄衡州之計該大臣等務當督飭各鎮將於水陸要隘設伏
嚴防毋令伺隙奔竄衡州爲省垣屏障程喬采駐紮該郡人心所
繫不可稍有搖動尤須嚴飭文武兵勇加意防守杜賊北來之路
毋誤事機省垣重地亦須鎮靜彈壓嚴密守禦不可稍涉張皇該
大臣駐守永州足壯聲威趁此賊勢散渙之時嚴飭各路帶兵大
員合力兜剿前截後追庶可一鼓蕩平昨據徐廣緒葉名琛奏羅
境凌十八股匪殲擒淨盡已諭令選派得力將弁乘勝帶兵馳赴

湖南協剿刻下各省續調精兵計亦陸續到齊兵力不爲不厚亟望該大臣等速殄醜類綏靖巖疆慎勿老師糜餉再有疏虞也查奏守城出力各員摺內據稱副將瞿騰龍鄧紹良守禦最爲出力何以此次保舉單內未經列入或因三月間鄧紹良已得優敘瞿騰龍已賞勇號不須再保耶著查明覆奏前據御史陳慶鏞奏請嚴申軍法一摺著該大臣查照摺內所陳各情酌量辦理原摺著鈔給閱看將此由六百里諭知賽尙阿程喬采並諭令駱秉章知之尋奏瞿騰龍等守城有功已邀恩獎不復再行開列報聞○諭常大澣奏湖南岳州府爲湖北全省屏障見擬親赴該處查看情形督同府縣及紳士等籌備防堵酌定章程等語兩湖交界地方犬牙相錯自應不分畛域扼要設防據稱岳州紳士吳巽行方宗鈞等才略可用著卽密向咨詢與地方官妥籌布置其由武昌至

岳州所過地方水陸各要隘應行察看設備之處並著豫爲籌辦
毋稍疏虞將此諭令知之○以廣西官紳守城擊賊出力賞在籍
翰林院侍讀龍啟瑞御史朱琦等花翎復已革提督向榮職餘升
敘有差○壬戌諭內閣前據陸建瀛奏請截留湖南及江西尾幫
等漕米作爲江南山東賑需當經降旨准行並飭嚴催渡黃各幫
跟接北上茲據李德奏稱山東湖河盛漲漕船難以趲運若俟秋
後水落再行緯挽北上必誤回空請將已入東境之漕船概行截
留以備東省賑米之用其在後渡黃各幫行至江南就近截卸除
留備兩省賑米外餘米均在沿河散囤俟豐工合龍雇船起剝運
通等語截漕備賑事關緊要豈容稍有延緩著戶部查覈該督撫
等前後陳奏各情形究應截留何幫漕米以濟急需迅速定議奏
請遵行毋任兩省各執己見致有貽誤至沿河散囤及雇船起剝

各事宜有無窒礙之處著該部一併速議具奏○撥山東海疆經費銀給廣艇水勇工食○癸亥諭內閣陸建瀛奏湖北督運道員等耽延阻滯請飭漕運總督速催趲行等語本年豐工未合運道未能疏暢自與往年情形不同然漕船果能依限開行該漕督及糧道等於盛漲以前實力督催設法挽運何難跟接北上乃自有截漕變價之議朕觀諸臣會奏卽有藉詞觀望之意是以疊降諭旨令該督撫等趕緊催趲不得以截畱漕米運道艱滯藉口遷延茲據陸建瀛奏稱湖北糧道龔綬及押運同知誠意自四月行抵瓜口沿途耽延兩月經該督嚴飭始肯渡河猶復節節逗遛以致江西全幫阻壓似此任意延玩不知是何居心豈視天庾正供竟可虛擲河干諉過他人耶龔綬誠意均著先行交部嚴加議處仍著楊殿邦飭令該員等督押幫船飛挽前進如再延誤惟該漕督

及該糧道等是問○諭軍機大臣等徐廣縉奏辦理廣西剿堵各事宜並量裁省局各摺片前因廣東羅境逆匪蕩平諭令徐廣縉葉名琛選派得力將弁管帶獲勝兵馳往湖南軍營協同圍剿並諭令酌派總兵福興統兵前往茲據該督奏稱已飭福興統帶精兵二三千名前赴廣西就近將鬱林一帶土匪迅速剿滅等語自係爲先除本境匪徒兼資防堵起見惟湖南道州及竄擾江華永明賊匪昨據賽尙阿等奏全股東竄徑由水打鋪竄至下灌地方屯紮見在郴桂剿辦喫緊之際且恐各省續調之兵未能到齊衡永兩郡情形甚爲緊要該督仍當悉心體察隨時偵探如楚省急需援應卽派福興統兵迅由間道馳往協剿務須先其所急速殄羣醜無誤事機另片奏量行裁減省局支應一節所見甚是卽著照所議覈實辦理仍移咨勞崇光確切查覈從前辦理糧臺官吏

紳民等有剋扣冒領等弊卽著從嚴參辦至湖南軍餉近又請撥三百萬兩已由戶部籌撥一百五十萬其餘另行籌款陸續撥給見在兩粵地方漸就廓清惟此股逆匪勢尙猖獗不得不厚集兵力以期一鼓殲除而籌款維艱且慮緩不濟急朕心實爲焦灼著徐廣縉葉名琛於廣東省設法籌畫無論關稅錢糧及正雜各款或於商棧暫行通融如湖南待用甚急卽迅速酌撥以濟要需諒該督等必能統籌全局以紓朕念將此由六百里諭知徐廣縉並諭令葉名琛勞崇光知之○諭前據奕山布彥泰奏葉爾羌三品阿奇木伯克回子郡王愛瑪特呈控該大臣各情並德齡倭仁奏該伯克訛索回莊各款及春熙奏夷匪鐵完庫里霍卓竄擾烏什畢底爾卡倫經官兵擊退一摺疊經諭令布彥泰前往葉爾羌查辦茲據奕山等奏愛瑪特二次遣人投遞呈詞鈔錄呈覽著布彥

泰仍遵前旨迅卽馳赴葉爾羌將德齡所參及該伯克歷控各情秉公確查逐款研訊是否該大臣等參辦不公抑係該伯克藉詞挾制據實覈辦毋稍遷就至夷匪鐵完庫里先擾喀什噶爾旋即竄至烏什雖經官兵擊退見在尙未遠遁事關控制外夷撫緝回眾布彥泰久歷邊疆一切情形熟悉諒能妥籌辦理操縱得力也將此由四百里諭令知之○欽差大臣協辦大學士杜受田等奏陳辦理江南賑務情形並呈江甯布政使祁宿藻所擬章程得旨該藩司所擬章程甚屬周妥卿等督辦賑務未能深悉地方情形務須責成該藩司盡心籌畫至應截畱何幫米石已飭戶部速議著候部議行此旨著傳諭祁宿藻知之○甲子諭內閣見在湖南軍務未竣賊蹤竄擾靡定各路帶兵攻剿需材孔亟因思滿漢各營中豈乏材技出眾足備干城之選者或因官職較卑限於資格

無由及時自效殊爲可惜著各該將軍都統督撫等畱心簡練隨時考察自鎮將以下無論官職大小有謀勇兼裕或材力堪任折衝禦侮者卽行據實保奏候朕簡用其鄰近湖南省分如保奏之員可資軍營差遣卽奏明請旨飭令該員前赴軍營聽候欽差大臣等酌量委用該將軍等其愼加遴選毋濫毋遺用副朕整軍經武之至意○諭各省設立城垣所以保衛民生盤查奸宄自應一律修葺完整方能有備無患近聞各直省府廳州縣城牆每因圯建日久坍塌甚多地方官或將存公修築銀兩私自侵用或以經費不敷相率因循一旦有事遂至守禦無資卽如廣西湖南賊匪竄擾各州縣若城垣堅固防守更可得力何至一經賊擾遽爾失守且聞各省門禁廢弛漫無稽查啟閉並不依時竟有終夜不禁出入者殊失詰奸禦暴之道著直省各督撫轉飭所屬凡有應行

修理各城務須隨時設法籌辦以資保障其有官民捐貲修理者著卽覈實奏請獎勵並嚴飭地方文武員弁認真查察慎司啟閉毋任宵小涸跡致滋事端將此通諭知之○貸閩粵南澳鎮銅山營兵丁穀價銀○丙寅諭內閣協辦大學士杜受田秉躬端正勵節直清經術淵醇體用兼備蒙 皇考宣宗成皇帝特達之知由詞臣視學山西 特詔還朝旋入直上書房爲朕講習討論十餘年中日承啟迪獲益良多嗣經洊歷正卿忠勤益懋朕親政後加太子太傅銜以刑部尙書協辦大學士特命管理禮部事務每召見時於用人行政國計民生造膝敷陳深資匡弼前因豐工尙未堵合江南山東兩省窮黎急需賑恤宵旰焦勞難安寢饋特派前往查辦疊據途次馳報東南賑務均已布置周妥念其觸暑邁征心力交瘁正切惓懷而前後奏摺中從未自陳病狀乃本日怡良

等馳奏杜受田竟以感受暑溼觸發舊患肝證於本月初九日遽至不起披覽遺章不覺聲淚俱下悲痛實深回憶書齋景況如在目前奉使陛辭情尤眷戀方冀贊襄帷幄讜論常聞詎料相睽兩月晤對無期耶著賞給陀羅經被由驛發往加恩晉贈太師大學士入祀賢良祠卽照大學士例賜卹任內一切處分悉予開復應得卹典該衙門察例具奏並賞給廣儲司銀五千兩經理喪事靈柩回京沿途地方官妥爲照料護送准其入城治喪屆時朕當親臨奠醑用伸悲悃伊父頭品頂帶前任禮部侍郎杜壻年屆九旬猝聞此信定深悼痛著派恩華卽日前往看視並賞給人蔭十兩以資調養伊子杜翰著俟服闋後加恩以庶子補用伊孫三人均著加恩賞給舉人准其一體會試以示朕愴懷舊學恩眷優加之至意○諭朕念杜受田之父杜壻年近九旬在京就養猝聞伊子

差次病逝自必傷感逾常伊孫杜翰見任湖北學政惟伊次孫杜翻一人在京若前往清江奔喪則伊祖杜塤膝前乏人侍奉朕心實深廬念著傳旨令杜翰卽由湖北馳赴清江浦扶柩回京所有學政關防暫交巡撫兼署杜翻卽在京侍奉毋庸前往以示體恤○諭軍機大臣等據怡良楊以增奏欽差大臣協辦大學士杜受田因病出缺一摺所有應行查辦事件卽著怡良按照疊次發交各摺件督飭隨帶司員認真覈辦據實覆奏卽在清江浦聽候諭旨再赴福州將軍之任將此諭令知之○欽差福州將軍怡良等奏遞欽差協辦大學士杜受田遺摺得旨憶昔在書齋日承清誨銘切五中自前歲春懷承大寶方冀贊襄帷幄讜論常聞詎料永無晤對之期十七年情懷付與逝水嗚呼卿之不幸實朕之不幸也○丁卯諭軍機大臣等昨據羅繞典奏籌商省城應辦事宜一

摺據稱行抵湖南省城聞江華永明桂陽州嘉禾失守賊匪見由小路分竄下窺各處拏有奸細該前撫在省調度防禦省城南門及大小西門外樹建木城沿江之昭山龍潭灣先已設有木筏守兵各等語江華永明賊匪竄出前經賽尙阿等奏明其桂陽嘉禾兩城如何失守情形未據馳報嘉禾至桂陽僅百里北界衡州亦近儻再任其竄擾衡湘各路帶兵大員所司何事自賊匪擾入楚境各州縣紛紛失守大兵止能尾追並不能設奇要擊寇往而我亦往勢將何所底止見在賊眾是否占踞城池意圖越過永州大營直窺衡郡我兵如何截剿使賊不敢北竄該大臣等務卽督飭諸軍分扼水陸要隘並飭遠近各郡縣偵獲奸細確訊賊情則剿辦更易得手其省城外木城或可禦賊矢石若賊以礮火攻撲豈不轉資賊用卽如賊踞永安道州皆用土石壘牆以禦官兵豈我

兵反智出賊下耶其木筏一項亦恐運掉不靈賊匪得之適足爲梯衝之具果否適用不致貽患均著該大臣等妥籌辦理思患豫防固不厭精詳也將此由六百里諭知賽尙阿程喬采並諭令羅繞典駱秉章知之○以李嘉端爲兵部右侍郎俞長贊爲內閣學士由詹事選○戊辰諭內閣前據給事中袁甲三奏參定郡王載銓刑部尙書恆春侍郎書元直隸總督訥爾經額各摺片已據該郡王等各具摺明白回奏復派大學士裕誠會同軍機大臣將該給事中回奏指出之御史端昌祭酒彥昌刑部郎中吳德清前任刑部郎中直隸知府吳廷棟等傳到查詢先後覆奏如原參載銓題升步軍統領衙門主事與查辦刑部擬補主事並奏咨刑部各案或會同部臣議結或隨時酌量辦理其訥爾經額向伊雙膝請安一節查明並無其事均無庸議惟諸王與在廷臣工不得往來交接

疊奉一聖訓垂誠周詳前歲冬閒朕復特降諭旨申儆自應敬謹遵守乃恆春書元因審辦案件盛氣相凌俱至載銓府第私謁當時載銓既未拒絕事後又不參奏至拜認師生例有明禁據載銓奏稱於保舉之人欲以師生稱謁者不能豫爲攔阻等語均屬不知避嫌有違定例載銓著交宗人府嚴加議處恆春至載銓府中私謁並將審案節略面交已據載銓奏明乃恆春回奏率稱於扈蹕回京後從未謁見並無送給案據之事顯係意存欺飾書元初次回奏既不將私謁載銓府第一節聲敘迨降旨詰問仍復含混回奏且於召見奏對之言輒屢向同堂洩漏並以相契談心曲爲解說實屬不知愼密有負委任恆春書元均著交部嚴加議處至載銓所繪息肩圖題詠甚多內閣學士載齡內閣侍讀許誦恆均係師生稱謂顯違例禁載齡許誦恆均著交部議處其題圖之潘

世恩卓秉恬祁騫藻柏後周祖培麟魁吳鍾駿黃贊湯錫齡文慶
慧成富隄雅杭阿潘曾瑩潘曾綬葉名灃等亦有不合著一併交
各該衙門分別議處所有傳訊各員無庸置議吳廷棟著回直隸
知府署任給事中袁甲三例許風聞言事且所奏尙非盡虛惟覆
奏片內所稱名節攸關難以隱忍等詞自謂白其心迹未免負氣
爭辯古來諍臣謬謬之風本於忠愛豈爲沽名若將該給事中加
以譴責恐言事諸臣誤會朕意率安緘默殊非朕芻蕘必採之本
意嗣後科道等官惟當各秉公忠靖共獻納毋避嫌怨確實指陳
但不得以傳聞影響之談輕率入告徒博彈劾之名也○諭軍機
大臣等據給事中袁甲三奏參載銓恆春書元各摺片內稱上年
刑部郎中文秀由殺虎口稅差報滿回部饋送書元代土銀三百
兩書元收受後當文秀未放甯紹台道之先忽一日進署於司官

回事既完諭令文秀畱後告以今日召見時曾經面保指日就放
文秀聞之自喜回至秋審處告知同事司官並送銀數目展轉傳
播通國皆知等語除已令書元明白回奏外著王懿德迅卽飭令
文秀將以上各情節逐一登覆不准稍有含混取具親供據實覆
奏將此諭令知之○己巳諭內閣前因李德奏稱山東湖河盛漲
漕船難行請將各幫分別截畱散囤雇船剝運一摺當交戶部迅
速定議茲據該部查覈議奏天庾正供關係甚重又有截漕備賑
米石京倉支放更恐不敷豈可因運道艱滯藉詞逗遛致有貽誤
況各幫或經由鄱陽湖或長行大江衝風破浪皆所習慣即使微
山等湖河水盛漲緯道淹沒亦當設法輓運豈有因河工未合坐
視漕糧不抵京倉之理見在渡黃漕船統計一千二百十隻在後
之湖南三幫見亦提近江口可見漕運地方各官如果竭力督催

自不難銜尾北上豈得以一二隻偶爾失事遂任聽全幫藉口且將在前各幫先行截留則後幫皆被阻壓辦理亦未妥協著仍遵前旨江南賑米在於湖南及江西尾幫截留山東賑米在於江西最後各幫截留至沿河散囤折耗偷漏以及雇船搬價種種窒礙難行所有在後各幫仍著該漕督嚴催跟接北上京倉緊要該漕督所司何事豈得畏難苟安任令幫丁及地方官各爲私計竟置京倉於不顧耶其已入東境各船並著李德嚴飭文武員弁迅速催趲該撫甫經到任無所用其回護如該管道廳及催漕將弁查有延玩等情卽著據實參奏至運京銅鉛各船亦著一併飭催隨漕北上毋稍遲誤○諭舒興阿奏番賊滋擾被剿遠遁見飭各營嚴防一摺據稱甘肅涼州永昌協所屬口隘突有番賊多人肆出搶奪牲畜戕害弁兵經提督索文西甯鎮總兵雙銳署涼州鎮總

兵崇保先後各派將弁帶兵剿捕疊次殲斃番賊數十人餘匪被追遠遁入山見在逐細搜查卡內均無賊蹤等語此次番賊出擾不過三四百人適值該提督會哨之時所帶弁兵自敷派委果能認真督率實力堵擊何難悉數殲除署總兵崇保是否耽延貽誤其稟覆該督情節與提督崇文原報不符有無捏飾著舒興阿確切查明據實具奏仍嚴飭該提督等督飭將弁隨時偵探加意嚴防一遇番賊滋擾卽行截剿務將賊賊並獲斷不可聽其出沒自由輒以追擊遠遁一稟了事也○庚午諭內閣奕山布彥泰奏賊匪竄入喀什噶爾卡倫官兵追剿連獲勝仗餘匪逃竄一摺喀什噶爾地方前於五月間有賊匪鐵完庫里糾眾入卡被剿竄逸當經諭令該大臣等偵探嚴防茲於六月初九日又有逆匪倭里罕糾約布魯特賊匪二百餘人自圖舒克塔什卡倫竄至小河爾圖

什莊總兵桂齡帶兵往剿於初十日馳至伊斯里克卡倫賊已聞風逃出卡外十三日賊匪由伊蘭瓦斯卡倫竄撲阿爾胡莊桂齡馳赴迎擊該匪膽敢抗拒我兵槍礮齊發殲擒賊匪多名復向巴爾昌卡倫追剿斬獲甚多餘匪逃出卡外仍著督飭守卡員弁隨時偵探加意嚴防毋稍疏懈○諭軍機大臣等奕山布彥泰奏喀什噶爾又有逆裔帶領賊匪入卡官兵連獲勝仗斬擒多名餘匪逃竄一摺賊匪鐵完庫里先經竄入喀什噶爾旋擾烏什卡倫疊據該大臣等先後奏到降旨令布彥泰馳赴葉爾羌確查妥籌辦理此次奕山等所稱六月初九日又有逆裔倭里罕帶領布魯特賊匪自圖舒克塔什卡倫竄入經總兵桂齡等追剿至巴爾昌卡倫逃出是該匪等仍在卡外窺伺並未遠颺守卡官兵何以任其出入毫無抵禦是否疏於防範有無被賊拒傷據報賊匪二百餘

人何以又稱殲斃不計其數是否回莊已被裹脅摺內俱未聲明
所稱逆裔究係某逆後裔刻下因何起釁見又竄往何處著布彥
泰仍遵前旨迅速赴葉爾羌逐細詳查相機妥辦並迅飭各城邊
卡一體嚴防務期弭患未萌毋得稍形疏懈亦不可稍涉張皇將
此由四百里諭令知之尋奏喀什噶爾守卡官兵均未被拒受傷
逆裔倭里罕查係巴布頂之子張格爾之姪鐵完庫里句結前來
並無起釁別情見已遠颺兵皆歸伍報聞○辛未諭內閣宗人府
奏遵議定郡王載銓處分一摺載銓著改爲罰王俸二年不准抵
銷其所兼領侍衛內大臣著卽開除並無庸管理健銳營事務○
壬申賽尙阿程裔采奏據和春等稟報六月二十七日賊由下灌
分遣數百人復竄水打鋪二十八日和春親督大兵追至下灌常
祿等兵至甯遠縣城時賊已於是日早由下灌分竄藍山縣之楠

禾橋及嘉禾縣城殺傷鄉勇嘉禾失守和春常祿等帶兵跟追沿途殺賊數十名二十九日紫營嘉禾縣城外之夏門墟初一日和春督同各鎮將兵勇分路進攻該逆見我兵將至城下遂開槍礮我兵逼近城根奪門而入賊猶有數百人執械巷戰殺賊一二百名餘匪由北門奔逃我軍追至城外十里之西車灣餘賊四散當於西車灣某營酌畱楚勇四百名守護縣城搜捕餘匪撫諭居民查詢城中文武未知下落常祿之兵行抵新田初二日探報行囊墟地方賊眾數百屯紮桂陽州城業已被陷初三日和春由旌德礮救營至距桂陽州城十里之七里亭賊猶占踞我兵掩至殺賊數十名適副將明安泰參將虎嵩林都司米興朝等帶領湖南四川官兵趕到合力同追直至城下斃賊不計其數該逆復由城內擁出約二三千人勢甚兇很我兵連開槍礮該逆數次撲來均爲

我兵壓下是日鏖戰五時之久先後斃賊四百餘名千總馬金柱及幫帶楚勇把總銀邦光陣亡其餘兵勇亦有傷亡是夜四更州城火起和春傳各營兵勇出隊黎明兵勇翻越山坡遙見該逆已從東門絡繹前往郴州大路探報初三日該逆竄至郴州奪城占踞此次賊蹤飄忽旬日之間奔竄數百里我軍節節追剿其勢萬難四面合圍猶幸賊至嘉禾桂陽和春等大軍緊追奮力剿殺賊眾奔竄兩城旋即克復臣賽尙阿臣程喬采究屬未能先事豫籌臣賂秉章亦有地方之責相應請旨一併交部議處見在郴州被踞該處地頗豐腴市廛屯聚爲廣東入湖南要口距州四十里河面船隻甚多一以資賊貽害不淺查該處下游永興耒陽皆爲泊船處所臣程喬采已豫飭地方官將船隻盡行撤去該州水路自永耒而下直出耒陽河口即達衡州下游逼近長沙陸路由永興

可走安仁攸縣等屬更可直達長沙臣屢經函屬臣駱秉章於川
陝新兵陸續到省時截留保衛其先到永州之江西官兵一千名
見已飭令趕赴長沙協同固守以重根本臣賽尙阿卽於十五日
由永州移營馳赴衡州與臣程喬采會合一處軍中諸事得以籌
商調度並飛咨江西撫臣於交界嚴防又疊次飛咨廣東督撫臣
徐廣縉葉名琛於廣東交界嚴防相機派撥兵勇以備迎擊其桂
陽進剿陣亡之千總馬金柱把總銀邦光應請飭部議卹又銀邦
光一員自備資斧投效隨同打仗數十餘次實屬奮勇得力今以
殺賊臨陣捐軀尤堪憫惜懇交部加等照千總例議卹上諭軍
機大臣等據賽尙阿程喬采馳奏逆匪竄入嘉禾桂陽旋復攻陷
郴州一摺逆匪自竄湖南以來勢甚剽悍連陷數城如入無人之
境固由土匪勾結內應何以各州縣地方官兵旣不能先事偵緝

又不能嬰城固守迨至賊匪棄城逃竄又復任其所之全無抵禦該大臣奉命出征一年有餘粵楚各處紛紛失守歷次奏報軍情不過派兵尾追並不迎頭截擊出奇制勝所謂調度者安在程喬采籌辦防堵爲日已久何以地方文武毫無布置遇賊撲城竟不能相持數日以待外援耶見在賊已越過永郡踞守郴州勢將下窺衡郡意圖長沙似此蔓延何所底止竇尙阿見赴衡州與程喬采會籌防剿若再失機自問當得何罪朕已諭令徐廣縉督同福興帶領精兵數千名馳赴衡州一帶協同剿捕各省續調之兵計已到齊衡湘乃楚南門戶最爲緊要該大臣等務當通盤籌畫激勵將士分扼要隘趁賊喘息未定時併力夾擊迅掃逆氛尙可稍贖前愆其廣東廣西江西各省交界處所並著隨時知照一體嚴防毋任竄越羅繞典卽著在長沙省城與駱秉章籌辦防守總須

慎密鎮靜緝匪安民毋使人心稍有搖惑將此由六百里諭知賽
尙阿程爾采並諭令羅繞典駱秉章知之○諭據賽尙阿等奏湖
南逆匪竄擾情形見復攻陷郴州嚴飭督勦一摺逆匪自竄入楚
境以來連陷數城雖土匪勾結滋蔓總因督兵大臣調度失宜將
弁不能用命所致見在郴州又復失陷被賊屯踞該處地頗豐腴
市廛屯聚水陸兩路北通衡州長沙而水路尤爲喫緊賊匪勢甚
剽悍意存窺伺衡湘爲直撲長沙之計賽尙阿自統領大軍以來
日久無功朕早慮其性情過於慈柔賞罰未能悉當以致將弁等
日久生玩不肯用命更恐爲賊匪所窺動輒中其奸計是以前降
旨令該督統兵前赴廣西如賽尙阿病體不支卽接受欽差大臣
關防專辦軍務及該督到梧州而桂林匪徒已竄楚南彼時艇匪
正須剿洗該督勢難兼顧今潯梧一帶漸次廓清卽各處土匪勞

崇光儘可籌辦較之楚匪情形自當先其所急徐廣縉沈毅有爲朕所深悉前次圍剿凌十八股匪甚爲嚴密卒致殲除波山艇匪亦能剋期剪滅足見用兵之道全在統率得人見在湖南逆燄鴟張情形甚爲喫重著徐廣縉統兵前往湖南會剿卽將高州鎮總兵福興所帶得勝之兵數千名迅速統帶馳赴衡州一帶扼要調度毋稍遲延並將此旨宣示賽尙阿卽將欽差大臣關防交徐廣縉祇領軍營及地方文武各員統歸節制該大臣務當整飭紀律嚴明賞罰以期壁壘一新迅殄羣醜庶釋朕南顧之憂也賽尙阿交卸關防後仍著奏明聽候諭旨至廣西土匪卽責成勞崇光妥爲防剿毋稍疏虞提督向榮或帶往軍營或畱廣西督辦土匪並由該大臣酌量飭行將此由六百里諭知徐廣縉並諭勞崇光知之○諭本日據賽尙阿程裔采馳奏賊匪竄踞湖南郴州已有旨

諭令徐廣縉由廣西帶兵馳赴湖南會剿所有兩廣總督並欽差大臣關防著葉名琛署理廣東巡撫卽著柏貴暫署楚粵交界地方防堵緊要該署督務嚴飭提鎮及地方文武員弁隨時偵探扼要設防儻須越境夾擊毋稍拘泥致失事機至廣西湖南兩省軍餉如有緩不濟急之處該署督撫仍遵前旨無論何款趕緊設法籌備以資撥解將此由六百里諭知葉名琛並諭令柏貴知之○諭湖廣總督程裔采到任以來辦理地方尙無貽誤惟前聞賊匪一入楚境先由衡州退回省城旋又折赴衡州如此舉動未免張皇恐臨事識力不能堅定致失機宜著徐廣縉詳加訪察如果不能勝任卽著據實奏聞毋稍徇隱將此附六百里密諭知之○召徐澤醇來京以裕瑞兼署四川總督由成都將○以剿賊無功軍兼署賽尙阿程裔采駱秉章交部議處○癸酉御史黎吉雲奏湖廣督

程喬采去年奉命馳往廣西防堵該督專駐衡郡城中去廣西界
尙三四百里之遙駐衡幾及一年如結寨築堡守險設伏諸法均
未講求當賊破全州渡黃沙河至永州正在抵禦喫緊之際該督
乃於四月二十五日微服乘小漁船棄衡州而下城中官民泣畱
不得又適接到永州勝仗之報遂於五月初四日復往衡州自該
督起程後沿途各屬驚傳制軍逃走均疑永州已被居民相率奔
竄老弱婦女投河死者不計其數夫賊蹤尙遠該督舉動一輕遂
使數郡居民受害至此臣籍隸湘潭諸所指陳皆有時日可按事
蹟可稽既居言職不得不據實直陳又奏臣昨見同鄉信函多言
賽尙阿見在患病其言當非憑空結撰臣伏讀本月十四日上
諭據奏云該匪不能窺伺甯遠又云竄往下灌地方游弋屯聚臣
查下灌卽係甯遠所屬之地省郡志可稽該大臣等語涉支離似

亦卽係精神不能照顧之證當此事情重大若果該大臣患病恐致貽誤軍情 上諭軍機大臣等本日有人奏督臣舉動乖方大爲民害一摺程喬采防堵年餘任令粵匪竄入楚界已有應得之咎復於軍務喫緊之際退回省城以致人心動搖雖旋即折回衡郡而舉動倉皇中情恇怯已可概見著徐廣縉按照摺內所指情節逐一訪察如果確實卽行據實參奏毋稍徇隱另片奏傳聞賚尙阿患病甚劇前奏賊竄下灌語涉支離卽係精神不能照顧之證等語著一併查明密行覆奏原摺片均鈔給閱看又據副都統阿彥達奏陳軍務四條如募勇宜汰一條頗中時弊一併鈔給閱看著卽體察情形酌量辦理軍行首重紀律賞罰尤貴嚴明朕旣命徐廣縉爲欽差大臣事權歸一自當乘此聲威力加整飭各路官兵如有玩誤軍令者卽行嚴參治罪參遊以下一面奏聞一面

卽行正法以肅軍紀而振疲玩至賊匪竄擾郴桂之閒意圖下窺
衡湘萬分喫緊程商采旣不足勝任而賚尙阿又復患病難支朕
心實深焦灼著徐廣縉於接奉諭旨後迅速督帶官兵前往並將
啟程日期先行馳奏萬不可稍有延緩致誤事機諒該大臣必能
統籌全局慰朕廑念也將此由六百里諭令知之○甲戌諭內閣
乾隆年間 高宗純皇帝特降諭旨以禮義廉恥居官者立身之
要侍衛部院司官有見該堂官輒屈一膝者於定制甚爲錯謬通
行曉諭俱著侍立回事並諭有見王等長跪請安者凡王大臣遇
見卽行參奏迨嘉慶十八年復奉 仁宗睿皇帝明晰申諭 聖
訓煌煌自當敬謹遵守但恐日久玩生仍蹈卑鄙諂諛之習不可
不重申諭禁嗣後各臣工於親王郡王遇有公事接見禮儀自有
定分不得長跪請安其侍衛部院司員接見本管堂官止應侍立

回事儻有不遵定制屈膝請安者卽著指名參奏以肅體制而除陋習將此通諭知之○諭昨因協辦大學士杜受田於差次溘逝業經降旨加恩茲據禮部查明應得卹典奏請予諡因思杜受田品端學粹正色立朝 皇考宣宗成皇帝深加倚重 特簡爲朕師傅憶在書齋朝夕納誨凡所陳說悉本唐虞三代聖賢相傳之旨實能發明蘊奧體用兼賅朕登極後周諮時政利弊民生疾苦亦能盡心獻替啟沃良多嘉慶年間大學士朱珪仰蒙 皇祖仁宗睿皇帝鑒其品節 特諡文正杜受田公忠正直媲美前賢揆諸諡法實足以當正字而無愧無庸俟內閣擬請著卽賜諡文正其餘一切卹典均著照禮部所請辦理用示朕眷懷舊學崇錫令名至意○諭吏部等衙門奏遵議恆春等處分一摺刑部尙書恆春侍郎書元均著改爲降四級調用內閣學士載齡侍讀許誦恆

均著改爲降二級調用潘世恩卓秉恬祁寯藻柏葭周祖培麟魁
吳鍾駿黃贊湯錫齡文慶慧成富呢雅杭阿潘曾瑩潘曾綬葉名
澧均著改爲罰俸半年不准抵銷○諭軍機大臣等常大瀄奏查
勘岳州水陸要隘籌防各事宜並請補調鄰省官兵一摺見在賊
匪竄踞郴州意圖下窺衡湘賽尙阿程喬采合駐衡郡羅繞典駱
秉章駐守長沙復派徐廣緒督帶粵東兵勇馳赴湖南會同剿辦
各省續調官兵計日亦可到齊衡湘一帶大兵雲集當不致任賊
北竄惟兩楚地界處處毗連自應扼要豫防所有常大瀄親赴岳
州籌備洞庭湖漁船團練堵禦各事宜均著照所議辦理據稱湖
北防堵陸路兵力尙單本日已寄諭蔣文慶陸應穀於安徽省挑
取精兵一千名河南省挑取精兵二千名派定管帶將弁配足軍
裝器械豫備調遣著常大瀄隨時確切偵探如湖南剿辦得手徵

調自可從緩僅有警信卽行飛調皖豫距楚較近亦不至有誤事
機另片奏籌防荊州一帶並咨調駐防滿洲營兵一千四百名分
撥駐防等語著會同將軍台湧提督博勒恭武熟籌妥辦台湧應
駐何處自應體察情形扼要駐紮以便調度該將軍巡撫提督等
總須慎密籌防尤當持以鎮靜不可稍涉張皇致滋驚擾將此由
五百里諭知常大瀄並諭台湧博勒恭武知之○諭特克星額桂
齡奏續有另股安集延賊匪突入卡倫滋擾經官兵迎擊得勝一
摺該匪等屢次入卡滋擾見雖擊敗逃走而首逆未除難保不再
行勾結乘隙窺伺著該大臣等飭令各卡倫隘口嚴防密探儻仍
敢糾眾入卡卽激勵官兵務期悉數殲擒毋致稍有疏縱此次擊
獲賊犯同前次拏獲之密呢雅斯等四人著一併交葉爾羌參贊
大臣於審明後卽行正法將此諭令知之○諭阿靈阿爲刑部尙

書以麟魁爲工部尙書

由戶部右侍郎遷

○命安徽選兵一千名河南選

兵二千名豫備湖北咨調○乙亥調德興爲刑部左侍郎全慶爲

戶部左侍郎以愛仁爲吏部右侍郎

由大理寺卿遷

○以青麐爲戶部右

侍郎

由內閣學士遷

○撥河南藩庫銀二十五萬兩備東河防險工需○

是月免江蘇海運沙船旗丁應賠遭風漂失米安徽和州借修官
圩未完攤徵銀緩徵廣東佛岡等十五廳州縣道光三十年被擾
通賦浙江定海廳減徵額賦

八月己卯朔諭內閣前據椿壽奏浙省漕糧籌辦情形一摺當交

戶部速議茲據該部議奏見在江安等幫業已輓至濟甯則浙漕
之跟幫北上不至阻滯自應如該撫所奏一律催趨迅速輓運著

陸建瀛楊殿邦嚴飭所屬妥速籌辦不得再有稽遲致干重咎至

該省幫船至七月中旬尙未全入蘇境如此貽誤實從來所未有

該漕督及該撫糧道等所司何事所有漕運總督楊殿邦前任浙江巡撫常大淳署浙江巡撫椿壽浙江糧道胡元博均著交部分別議處以示懲儆並著吏兵二部查取浙江省經管運糧河道及總運領運各職名一併分別議處○徐廣縉奏七月十一日奉到諭旨飭令提督向榮接印任事十二日該提臣函稱已准撫臣勞崇光恭錄諭旨知照惟因病難速痊求臣代爲奏請開缺等情接聞之下殊深駭異查向榮屢經棄瑕錄用高天厚地捐糜難酬乃六月二十七日先已接印任事七月初六日奉到上諭之後竟敢藉詞病難速痊求爲奏請開缺實屬喪心昧良見當楚粵兩省防剿喫緊之時儻武員相率效尤何以挽將士驕蹇之頽風而宏國家駕馭之遠略相應請旨將向榮革職發往新疆充當苦差以爲藉病規避者戒上諭朕因向榮久歷戎行才尙可用於道光

三十年八月特旨調任廣西該提督到任以來偶有戰功無不立加優敘其官村古東兩次戰敗輒卽稱病遷延久曠職守朕以忠厚待人不爲逆億僅予薄懲旋復任提督賞還花翎並念其保守省城勞績開復革職畱任處分加恩伊子向繼雄以同知用前據吳文鎔張亮基參其夸詐冒功飾智欺人徐廣縉亦參其趨避過明非人是已朕俱不爲深究該提督宜如何激發天良痛改積習感朕棄瑕錄用之恩力圖殺賊立功之效乃本日據徐廣縉參奏向榮於六月二十七日先已接印至七月初六日奉到飭令任事之旨竟稱病難速痊求該督奏請開缺朕不料向榮喪心昧良膽大藐玩至於此極國家用人原期其才能幹濟卽使功過不掩亦不妨舍短取長若向榮如此存心殊出情理之外見當粵楚軍務喫緊之際文武員弁殫智竭力之時而該提督從容觀望竟欲置

身局外且可藉口於朝廷不能用其才統帥不能盡其力若軍營相率效尤兵驕將玩更復何所懲戒耶向榮著卽革職發往新疆效力贖罪以爲孤恩巧避者戒○諭軍機大臣等前因湖南賊匪連陷數城賽尙阿統領大軍日久無功諭令徐廣縉帶兵馳往祇領欽差大臣關防軍營乃地方文武統歸節制本日據奏籌辦剿捕廣西土匪各事宜均屬周妥惟見在湖南情形甚爲緊要該大臣仍當先其所急所有廣西各處土匪應如何派員防剿分別布置之處卽著勞崇光專司督辦該大臣接奉前旨著卽帶兵馳赴衡州相機籌畫調度勿令賊匪下窺衡湘致難措手總兵福興本日已補授廣西提督如須帶往湖南差遣其提督印務卽行派員署理湖南永州鎮總兵孫應照是否得力並著隨時察看據實具奏如不勝任卽派員署理毋令貽誤該大臣所參向榮湯俊各員

均能不避嫌怨忠悃可嘉此次前往湖南督辦軍務必能酌量緩急輕重秉公舉劾俾將士感奮用命迅掃妖氛以慰朕望也將此由六百里諭令徐廣縉並諭勞崇光知之○閩浙總督季芝昌奏假限已滿病勢未減懇請開缺得旨著暫緩開缺海疆要地一切

吏治營伍實賴卿整飭卿其緩緩調理不必性急○以陶樸爲內

閣學士

由太常寺卿遷

○庚辰吏部遵議欽差大臣賽尙阿湖廣總督程

喬采前任湖南巡撫駱秉章處分請照溺職例革職得旨賽尙阿程喬采駱秉章均著加恩改爲革職畱任○癸未初舉經筵道官

告祭

奉先殿

上詣傳心殿行禮御文華殿經筵禮成幸文淵

閣賜講官及聽講諸臣茶復賜宴於本仁殿自是以爲常○以恭

送

宣宗成皇帝聖容至盛京供奉加正黃旗護軍統領綿勳等

級

○甲申諭軍機大臣等陸建瀛奏江西防堵緊要擬卽親赴會

商辦理又奏浙漕遲緩情形各一摺另片奏堵築豐工請派大員督辦等語逆匪竄踞湖南郴州東與江西接界前已飭令陸元烺派兵防堵本日又降旨令羅繞典署理江西巡撫就近由湖南馳往辦理防堵事宜該督所請馳赴揚州趕辦鹽務奏銷卽回省清釐積案後以閱兵爲名親赴江西商辦防堵自係爲軍務緊要起見惟見在江南省河工漕務鹽務皆屬刻不可緩且皆該督經手專責之事豈可暫離更易生手所請親往江西察看防堵著毋庸議有應行咨會羅繞典之處隨時酌辦亦尙不至鞭長莫及其安徽備調官兵一千名本日已寄諭蔣文慶仍卽調赴湖北儻江西兵力不敷著該督酌量另籌調遣至豐工缺口陸建瀛楊以增原係失事之人自請戴罪於秋間堵築朕以使功不如使過且該督辦事素能任勞任怨仍令與楊以增一手辦理以期於事有濟節

降諭旨甚明何以此時忽請另派大員臨工督辦若因原派委員有被人指摘者姑爲此請無論委員人數眾多斷不能保其盡能覈實無弊且旣無瑕可指亦何恤乎人言而該督見在辦工卽盡用原派委員但期善補過以贖前愆亦不難再邀恩獎所有籌借江海關稅銀及海運節省項下銀兩如有不敷在藩關各庫及應解南河工需款內催提湊用後俟捐項收齊歸款均照所議辦理該督卽會同楊以增悉心籌辦無恤其他至本年浙江漕糧開兌過遲前此海運變價等議眾論紛紜幾於茫無頭緒今江安等幫業已催出東境可知各省藉詞觀望逗遛深爲可恨見在節逾白露浙船渡江僅百餘隻所論恐誤回空種種窒礙亦屬實在情形事已延緩至此卽交部速議尙恐展轉貽誤所有浙江重運幫船無論行抵何處卽著陸建瀛體察情形或尙可催趲北上或應如

何變通辦理該督卽行酌定辦法一面奏聞一面知照漕河地方各督撫趕緊照辦總期有益於公一切不爲遙制毋得再有異議更致貽誤其江南賑務該督撫等仍督飭藩司祁宿藻認真經理以專責成總之該督平素辦事才具朕所深悉兩江地大事殷且河漕諸多棘手朕亦深諒其難惟當黽勉報稱一以國事爲重想該督必能力任艱劇不負朕倚任成全之苦心也將此諭令知之○諭陸建瀛奏近年黃河淤墊日高洪澤湖水不能入黃高堰各壩連年啟放致將壩底刷通擬酌量改築滾壩兩三座俾上下游得以節宣且可省按年啟堵之費等語著怡良於查辦各務完竣後就近前詣該處確切查勘據實覆奏以憑覈辦原片著鈔給閱看將此諭令知之○諭本日據常大澂奏接據湖南稟報賊匪勾結土匪竄入安仁攸縣恐由瀏陽小路竄至平江瀏陽醴陵情形

已極危急並據葉名琛奏自六月初八日賊匪占踞江華以後至七月初三日攻陷郴州中間尚有六月二十八日攻陷藍山之事賊匪竄出道州以後疊陷數城葉名琛所奏月日歷歷如繪該大臣等於賊陷郴州以後如何勦辦情形賊蹤有無分擾他處迄今旬日未據奏聞朕心實深焦灼如常大濤所奏各情賊匪掉臂游行何所底止勢將越過衡州直犯長沙岳陽該處近接湖北有無準備想湖南前調湖北各兵此時勢難挽回已飭續調安徽河南精兵前往湖北備用見在衡州長沙岳州各屬旣已均有賊匪竄擾官軍止知尾追從未迎頭截擊且偵探賊情並無的信如廣東見獲奸細四十餘名皆道州江華零陵永明等處人爲賊探路起獲貨單等物自係假扮客商希圖溷迹若湖南亦能確探賊蹤先時防備何至被其勾結連城失守我軍布置機宜旣不能慎密而

賊匪轉得窺伺官軍消息恣意橫行所謂知己知彼者安在耶見在徐廣縉是否已抵湖南賽尙阿移營衡州以後與程商采如何布置兩楚交界如何設防並賊匪竄擾各處情形著卽迅速據實奏聞毋再延宕常大湊摺著鈔給閱看將此由六百里諭令知之○諭前有旨令徐廣縉馳往湖南接受欽差大臣關防督辦軍務屢經寄諭諒已接奉啟程矣本日據常大湊馳奏賊情緊急已有粵匪勾結土匪竄入安仁攸縣探知醴陵瀏陽情勢俱極危急等語是逆匪竄出道州以後勢更猖獗江華永明桂陽嘉禾郴州之陷迭經賽尙阿等奏到於聲敘月日亦未明晰茲據葉名琛奏自六月初八日賊匪先踞江華至七月初二日攻破郴州中間尙有二十八日攻破藍山之事似此情形不但衡州可以超越長沙岳州亦萬分喫重儻再延時日事有不可問者該大臣旣經奉旨接

受關防則湖南勦辦事宜已有專屬朕所以尙未明降諭旨者恐該大臣未到楚境而營中先有所聞號令愈不能行耳該大臣抵楚後卽將前奉諭旨宣示賽尙阿接受欽差大臣關防統領全軍計賊匪見雖肆擾尙在奔突未定之際且官軍勇練數萬人若得人調遣何至任賊橫行總由賽尙阿督師日久無功兵與賊均不免心生翫視賊翫我而益驕兵翫賊而益懈該大臣當嚴定賞罰申明紀律爲一鼓成擒之計士氣旣振賊膽自寒定可轉敗爲功紆朕南顧之憂也所有湖南前調湖北省官兵諒此時分布各處難以調回已諭知常大澣並飛調河南安徽兵三千名前往湖北聽候調遣該大臣到後察看情形如岳州勢當孔急則兩省交界處所尤當力籌堵禦萬不可再令蔓延湖北兵力較單豫皖征調恐到亦需時如何計出萬全俾居民不至驚擾之處著與常大澣

妥商辦理柏貴見已起程已諭令折回廣東署理巡撫以便葉名琛馳赴連州一帶防堵並諭令葉名琛如楚省剿辦得手有須夾擊之處即可越境圍攻兩粵文武皆該大臣統轄一切調度與葉名琛隨時酌辦定能迅掃妖氛剋期奏捷其廣西防剿各事宜著責成勞崇光經理該大臣仍與葉名琛隨時互相知照亦可聲息相通無虞睽隔常大溜摺著鈔給閱看將此由六百里諭知徐廣縉並諭勞崇光知之○諭常大溜奏賊情緊急請撥回前調官兵並請飭催各省官兵一摺粵匪自竄踞道州後連陷數城茲復勾結土匪竄入安仁攸縣岳州戒嚴該郡及所屬之巴陵臨湘平江各縣均與湖北連界自應不分畛域協力堵禦該撫請將調赴湖南官兵就近撥回亦係爲賊情緊急起見惟湖南剿匪正須厚集兵力前調湖北各兵能否撥回勢難遙制著該撫隨時咨會欽差

大臣等應如何移緩就急之處酌量辦理至所調安徽兵一千名河南兵二千名前已有旨令各該撫選備候調本日復有旨飭令迅速前往以備調遣諒可不日抵楚該撫卽會同將軍台湧提督博勒恭武妥爲布置於毗連各要隘嚴密設防斷不可稍有疏虞致賊乘間而入尤須撫綏彈壓密拏奸細示以鎮靜毋致人心惶惑將此由六百里諭令知之○諭前因湖南逆匪竄踞郴州當有旨令徐廣縉赴楚祇領欽差大臣關防督辦軍務並令葉名琛署理兩廣總督柏貴暫署巡撫茲據葉名琛奏辦理羅境善後事竣聞逆匪逼近廣東交界回省籌防逆匪由道州分竄未及一旬連陷數城所有廣東毗連各屬先經葉名琛移咨提督崑壽統率兵勇移營連州扼要防堵旋因韶連各屬均與江華藍山臨武宜章桂陽各州縣互相毗連復委副將通安帶領兵勇馳往防勦是該

省籌防尙爲周妥所奏探聽湖南賊情亦甚明晰自郴州失守之後見尙未據賽尙阿等奏報本日復據常大滄奏賊復竄入安仁攸縣東奔西突觸處堪虞楚粵毗連各要隘急應嚴密巡防以杜其奔竄之路柏貴啟程北上已有旨仍令折回署理巡撫著葉名琛卽酌帶將弁兵勇前赴連州一帶楚粵扼要地方駐紮調度且可與廣西近楚邊界聲息相通隨時咨會勞崇光籌辦一切徐廣縉抵楚後如剿匪得手仍須兩省夾擊該署督卽帶領弁兵出其不意越境協剿使該匪腹背受敵則殲滅更可迅速葉名琛與徐廣縉共事一方向能同心協力想必不分畛域計出萬全以副朕望也將此由六百里諭令知之○諭前有旨令葉名琛署理兩廣總督並令柏貴署理廣東巡撫茲據葉名琛奏稱柏貴見已由粵啟程來京柏貴著仍遵前旨署理廣東巡撫無論行抵何處接奉

此旨迅卽折回將此由六百里諭令知之○以羅繞典署江西巡

撫前湖北巡撫

○調安徽兵一千名河南兵二千名赴湖北剿賊○乙

酉諭內閣舒興阿奏涼州鎮屬之鎮羌卡外番賊復行竄入滋擾見派官兵勦捕一摺甘肅近年以來沿邊番賊每伺官兵進退以爲出沒前值提鎮會哨之期膽敢竄入永昌一帶滋擾甫經擊退復於七月間由鎮羌卡外竄入松山寬溝等處肆行劫掠甚至阻截道路拒傷官兵如果該營官平日偵探的確嚴拏內地奸匪杜絕勾引何至任其紛竄搶掠毫無顧忌見經該督派委署涼州鎮總兵崇保署督標中軍副將雙來莊浪協副將松齡署右營參將樂善等分帶官兵遏守要隘在煙墩溝炭窩溝等處兩次擊賊殲斃甚多並殪紅衣番僧數名該番等竄入黑茨溝藏匿並有甘州兵在察漢俄博金羊嶺一帶西甯兵在永安大通等處遏其歸路

趁此番匪腹背受敵之時亟應痛加勦洗以儆兇頑而靖邊卡著
卽責成該鎮將等趕緊追捕奮力夾攻如卡外沿邊尚有潛伏零
股卽著隨地殲除並飭提督索文西甯鎮總兵雙銳等一體偵探
嚴防總期有犯必獲毋得稍有疏縱另片奏署沙州營參將忠泰
藉口兵單待援並不及時親往堵擊致賊飽颺實屬恇怯無能安
西協副將連英經該鎮派令帶兵往援六月之久尙未啟程顯係
有意遷延均著舒興阿確查嚴行參辦傷亡弁兵查明照例請卹
○河東河道總督慧成奏報到任日期得旨事事實心經理不准
因循河員習氣固深有犯必懲勿稍寬假若無事時斷不可自負
清高常加詆詈旣不能得其力又不足服其心徒於事無益亦於
汝無益也誌之○丙戌署江西巡撫羅繞典前任湖南巡撫駱秉
章湖南提督鮑起豹奏粵匪竄擾楚境臣鮑起豹准大學士臣賽

尙阿照會赴省防堵並派撥江西官兵千名防護省垣旋准督

臣

程裔采來咨賊匪探聞欲由醴陵竄越江西屬卽撥兵赴醴陵茶

陵攸縣堵禦該匪自出道州久有分路撲省之謠正在調撥官兵

分投防堵突聞安仁攸縣於十八九等日失守賊卽轉竄醴陵至

二十八日辰刻猝至省城逼近南門外妙高峯駐紮

臣等當卽飛

調石馬鋪等處屯紮之陝西各營官兵相機合剿並於城上密排

礮位督飭四川江西各營兵勇登陴開放與該匪對擊相持兩時

之久復運大礮於南城魁星樓上連向賊營轟擊經四川營弁兵

瀏陽鄉勇首先斃賊百餘人賊勢稍退復向大西門小西門一路

潛行及東南鼇山廟等處分駐

臣

等復咨西安鎮福誠等約會各

營兵勇設法圍剿並於招募瀏陽勇二千名內先飭五百名向前

迎敵擊斃百餘人查探見到賊已有萬人尙有大股在後湖南省

城防守兵勇甚形單弱臣等惟有激勵將士熟商防剿並飛咨徐廣縉飭和春管帶大兵來省應援仍督飭員弁紳士分帶兵勇團練豫防土匪嚴查奸細以期人心固結兇燄立除上諭軍機大臣等羅繞典等奏粵匪竄偏省城見籌防剿一摺道州逆匪紛竄自攻陷郴州後安仁攸縣相繼失守茲復由醴陵竄至長沙省城偏近南門外妙高峰分擾近城各處似此猖獗殊堪髮指大軍見紮衡州乃任聽賊從間道直偏長沙並不派兵邀擊亦未據報近日攻剿情形豈坐擁重兵待賊自斃耶見在羅繞典等督飭四川江西各營兵勇登陴開放槍礮轟擊賊營雖賊勢稍退並斃賊多名而大西門小西門及東南龍山廟等處尚有賊匪分擾省垣重地豈可稍有疏虞如衡郡刻下尙未被圍賽尙阿卽帶領大兵迅赴長沙一帶督飭鎮將員弁於城外水陸各要隘分路攻擊城內

城外合力兜剿使賊匪腹背受敵有進退維谷之勢何難聚而殲
旃更宜嚴拏奸細多設偵探不惟知彼知己且內外聲息相通互
資策應則剿滅更易得手惟賊情詭譎難保不聲東擊西明攻省
垣暗遣夥黨分股竄擾或徑窺岳郡或轉掠衡州亦不可不偵探
的確豫爲布置並著程喬采督飭文武員弁分路堵禦以絕其紛
竄之路毋但坐擁郡城一籌莫展郴州失守後疊陷各城文武下
落均未據實尙阿等奏報是否道路梗塞文報不通朕心甚爲焦
灼著卽查明據實具奏毋稍延宕將此由六百里加緊諭令知之
○諭前已疊次降旨令徐廣縉馳往湖南接受欽差大臣關防督
辦軍務該大臣定已帶兵兼程前往本日復據羅繞典鮑起豹駱
秉章馳奏賊匪於七月二十八日由醴陵猝至省城逼近南門占
踞妙高峰經羅繞典等督率官兵登陴轟擊賊勢稍卻復由大小

西門至東南鼇山廟一帶潛行分擾雖省垣防守尙爲嚴密而兵力未免單弱見已有旨令賽尙阿統領大兵赴援衡州是否被賊圍撲亦尙未據奏報朕南望焦灼寢饋難安該大臣何日由粵帶兵啟程抵楚後應於何處要隘紮營何處分兵截擊總期迅速援剿萬毋稍誤事機且賊自郴州北趨越衡郡而徑撲長沙不顧我軍之襲其後若帶兵大員調度得宜賊之冒險深入亦有孤注之勢大兵前後夾擊何難一鼓殲擒但恐師老力疲將士驕玩畏葸致令賊氛日熾坐失事機軍情變幻旦夕不同亦難遙度想該大臣與朕同此焦思定能權衡緩急計出萬全也其兩粵防堵事務該大臣隨時與葉名琛勞崇光互相知照並將楚中勦賊情形與確探賊蹤所向隨時知會廣東廣西或嚴守邊界或越界痛剿妥籌辦理爲要羅繞典等摺鈔給閱看將此由六百里加緊諭令知

之○諭羅繞典鮑起豹駱秉章奏粵匪竄偏省城見籌防剿一指
長沙爲楚南根本重地逆賊旣由閒道疾趨而來並有大股匪徒
在後何以衡州大營官軍先期並無偵探沿途又未邀擊豈衡州
列下亦被賊圍撲耶且恐賊計詭譎陽撲省城而陰遣夥黨竄擾
岳州湖北防兵亦僅能自顧無暇越境攻擊朕心實深焦灼提督
鮑起豹幸已先至省城該撫等檄調陝西官兵屯紮城邊並招募
瀏陽壯勇迎頭截擊布置均尙妥協惟賊踞高憑險復分撲近城
各處我兵必須於城外要隘犄角環攻令賊進有堅城之阻退無
奔竄之路內外夾擊方可大挫賊鋒見已飛飭賽尙阿等速派鎮
將督帶大兵前來援應該撫等惟當激勵將士安撫居民毋令張
皇遷徙督率地方紳士勸募勇壯分守各門偵拏奸細盤詰賊情
虛實一面密遣得力文武官弁設奇出剿勿徒株守城中專待外

援致令賊勢更熾且賊越衡州而徑撲長沙不顧大營之襲其後亦有冒險孤注之勢如果長衡兩處合力兜剿使賊腹背受敵安知不轉敗爲功羅繞典昨已有旨令署江西巡撫此時防守緊要自未便分身前往俟張亮基抵任省圍解後再行奏明請旨湖南防剿情形並著隨時知照常大瀄一體嚴防毋稍疏懈將此由六百里加緊諭令知之○諭昨有旨令羅繞典署理江西巡撫就近由湖南馳驛前往本日據羅繞典等馳奏賊匪竄撲長沙省城見在督率兵勇籌辦防剿等語湖南省城防守見當喫緊之時該署撫勢難剋期前赴江西所有江西巡撫仍著陸元烺署理該省吉安瑞州袁州各屬多與湖南毗連且賊匪本有由醴陵竄越江西之謠邊界地方防堵綦要亟應嚴密布置俾免疏虞至團練保衛及地勢夷險情形本省紳士尤爲熟悉前任刑部尙書陳孚恩見

告養親回籍近在省城卽著幫同陸元烺辦理一切團練防堵事宜隨時商酌務使官民聯爲一氣布置周詳是爲至要將此由五百里諭知陸建瀛陸元烺並諭令陳孚恩知之○釋吉林效力已革陝甘總督琦善回旗○丁亥吏部遵議遲誤漕糧處分請將漕運總督楊殿邦前任浙江巡撫常大涓署浙江巡撫布政使椿壽均降一級調用浙江糧道胡元博降二級調用得旨楊殿邦著改爲降三級畱任並摘去頂帶常大涓椿壽均著改爲降二級畱任俱不准抵銷胡元博著改爲降一級調用仍責令趕緊押運北上一手經理毋再延誤○戊子祭 大社 大稷是日秋分夕月於西郊○諭軍機大臣等陸元烺奏賊鋒漸近撥兵防堵請酌畱銀兩以濟急需一摺道州逆匪紛竄見由醴陵竄徧長沙江西萍鄉龍泉等縣距楚甚近經陸元烺派委文武員弁管帶精兵分布嚴

防當不至稍有疏虞本日復諭令陸建瀛於安徽江蘇挑選精兵二千名備江西咨調該督撫等自當派委得力員弁管帶星夜馳赴至團練鄉勇雇募民壯所需經費著准其在於藩庫正項下畱備銀十萬兩以濟急需一俟捐餉充足卽行歸款當此經費支絀之時務宜加意撙節認真查覈不可稍有浮糜前任刑部尙書陳孚恩昨有旨諭令幫辦防堵團練各事宜本省紳士於地方情形自當熟悉一切保衛鄉里勸捐籌款該尙書受恩深重必能激發天良與該署撫相助爲理也將此由五百里諭知陸元烺並諭令陳孚恩知之○諭常大滄奏前調河南安徽官兵請仍飭如數調赴湖北一摺前據該撫奏請派調安徽兵一千名河南兵二千名當諭令蔣文慶陸應穀選派備調續據陸應穀以河南官兵未能多調陸建瀛以安徽官兵請俟江西得有續報再行調遣等語先

後奏到復經降旨令蔣文慶等仍遵前旨抽撥足數趕緊派往湖北本日復諭令江蘇安徽派官兵二千名以備江西防堵並於陝甘兩省再備精兵三千名豫備接替以壯聲勢其先經該撫奉調之安徽兵一千名亦諭知陸建瀛等仍派赴楚卽著該撫與將軍提督扼要派撥妥爲布置毋致稍有疏虞將此由五百里諭令知之○諭陸建瀛奏江西緊報疊至請將湖北省所調安徽官兵先行改赴江西一摺據稱探聞湖南之永興安仁攸縣先後被賊蹂躪七月二十日已至茶陵州與江西接壤勢甚危急自應添兵守禦惟昨據羅繞典等奏賊匪於二十八日由醴陵竄撲長沙本日常大瀄奏賊撲長沙省城恐分竄岳州常德直徧湖北是見在情形湖北尤爲緊要所有前調安徽官兵一千名著仍遵前旨飛速調赴湖北至江西兵力不敷著該督卽會同楊文定蔣文慶於江

蘇安徽二省官兵內選調精兵二千名馳赴江西吉安袁州瑞州一帶聽候署巡撫陸元烺會同在籍尚書陳孚恩酌量調遣將此由五百里諭令知之○己丑羅繞典駱秉章鮑起豹奏臣等因賊至省城城中僅存四川江西官兵二千餘名不敷防守當卽飛調駐紮金盆嶺之沅州協副將朱瀚管帶九谿等營官兵又咨飭陝西西安鎮福誠潼關協副將尹培立等分帶陝西官兵設法圍剿並咨寶尙阿程喬采迅飭和春管帶大兵來省應援二十九日該匪復於妙高峰上對城開放槍礮兵勇幸未損傷臣等指揮弁兵於城上用槍礮擊斃數十人該匪挑土肩石蟻聚塹上意欲建築礮臺臣鮑起豹督飭將弁用大礮連向轟擊傷斃數十人開然四散經臣等先遣瀏勇千餘人豫伏山下攔頭截剿又斃百餘人瀏勇亦有傷亡該匪仍踞鰲山廟及馬姓高屋於牆隙疊開槍礮我

兵分投放火將鼇山廟馬姓高屋焚燬該逆不能存身亦卽紛逃
兵勇截殺該匪大股繼至寡不敵眾而金盆嶺之沅州協副將朱
瀚先於二十八日因石馬鋪陝西營盤失守前往接應復有賊繞
黃土嶺回撲該副將營盤兵勇四散其在石馬鋪陝西潼關協副
將尹培立等管帶陝西兵二千名亦先與賊開仗尙無下落見在
該匪麇集南門外之金雞橋並瀏陽門外之校場時復游弋小烏
門等處人數甚眾晝夜環攻臣等疊次飛咨臣寶尙阿臣程裔采
將前撥安仁之河北鎮及鄧紹良並張國樑等兵勇六千名先赴
省垣並咨見在岳州防堵之湖北提臣博勒恭武迅帶官兵前來
應援又沿途迎提下游山黔等省未到官兵一面飛咨寶尙阿等
迅催和春帶兵來省救應臣等惟力保危城不任稍有疏失上
諭內閣逆匪自竄踞郴州以後膽敢繞越衡郡直撲省垣該大臣

等若能迎頭截擊何至令其肆行衝突即使賊匪冒險深入亦應迅速發兵救援將見在攻剿情形詳細奏聞何以半月以來並無奏章報到殊出情理之外賽尙阿程喬采均著摘出頂帶拔去花翎仍著賽尙阿統帶官兵馳援長沙徐廣縉此時當已督帶精兵行抵楚境著卽併力夾擊使賊匪進退無路庶期一鼓成擒湖北提督博勒恭武見在岳州防堵亦著帶兵前進趕緊應援羅繞典等務當激勵兵勇紳民盡力守護毋稍疏虞朕見復簡派各省勁兵卽日赴援必當殄此醜類撫我窮黎賽尙阿統領全軍程喬采督制兩湖均屬責無旁貸儻再玩誤失機自問當得何罪懍之○諭軍機大臣等本日據羅繞典等馳奏逆匪攻撲長沙省城情形危急一摺已諭令賽尙阿統領大兵前來救應並諭令徐廣縉迅赴湖南督辦矣因思湖南湖北唇齒相依若長沙稍有疏虞則湖

北更難防堵台湧見在荊州一帶擇要嚴防自可有備無患博勒
恭武近在岳州著卽督帶官兵星速馳往長沙援剿解南省之圍
卽可杜賊北竄之路該將軍等當酌量緩急毋得坐失事機原摺
著鈔給閱看將此由六百里加緊各諭令知之○諭前經疊次降
旨令徐廣縉帶兵兼程前赴湖南督辦軍務迅速援剿諒該大臣
見已啟行本日又據羅繞典等馳奏該逆匪於七月二十九等日
圍逼長沙我兵屢次堵擊並城外陝西營盤失利情形甚爲緊急
覽奏實深焦灼且恐寶尙阿等見在衡州形勢隔絕呼應不靈卽
派兵赴援亦恐不善調度致失事機該大臣接奉此旨務卽不分
晝夜星速帶兵前來並隨時偵探賊情相機籌辦仍將何時行抵
何處迅速馳奏用慰朕念羅繞典等摺鈔給閱看將此由六百里
加緊諭令知之○諭羅繞典等馳奏逆匪攻逼省城於妙高峰上

挑土肩石欲建礮臺經鮑起豹督飭將備用大礮擊斃數十人閤然四散又踞鼇山廟及馬姓高屋於牆隙開放槍礮我兵一面陽與接仗一面密遣兵壯分投放火將鼇山廟及馬姓高屋燒毀俾該匪不能藏身布置尙合機宜惟金盆嶺之沅州協副將朱瀚及石馬鋪之陝西各營盤均先後失利兵勇四散見在該匪麇集南門外之金雞橋並瀏陽門外之校場時復游奕小烏門等處人數甚眾晝夜環攻該撫等惟當設法守禦力保危城以待救援再該匪見聚南門等處其北路一帶諒不至於阻隔所有城內應需等物務須設法轉運源源接濟毋致有匱乏之虞方可持久仍須時出奇兵以撓賊勢賽尙阿統領大兵此時諒已行抵長沙湖北提督博勒恭武紮營岳州去長沙甚近計不日亦可帶兵趕到徐廣續自廣西督帶精兵計已行抵楚境該撫等惟當激勵守城兵民

紳勇竭力固守無稍疏懈並安撫居民密察奸細示以鎮靜勿令驚惶各路援兵一到卽飭城內兵勇與城外各兵併力夾擊俾賊進退無路庶不難轉敗爲功也陝西陝安鎮總兵福誠潼關協副將尹培立並沅州協副將朱瀚見在城外何處潰兵如何收集有無退避情事查明具奏將此由六百里加緊諭令知之○諭據羅繞典等奏湖南省城情形危急一摺該大臣等統領重兵防剿賊匪保衛地方是其專責乃任聽賊眾猖獗進逼省城漫無應援且省城被圍情形已兩據馳奏何以該大臣等並未具報卽使驛路梗塞亦當設法繞越一面迅速奏聞一面派兵赴援見據羅繞典等奏稱已疊次飛咨該大臣等派兵救應是文報猶未阻絕豈奏報轉難馳遞耶著將見在賊勢及剿辦情形迅卽據實具奏並著賽尚阿統帶各路將弁兵勇趕赴長沙合力援剿目下省垣十分

危急儻有疏虞更難措手徐廣縉此時想已帶兵抵楚湖北防堵之兵已諭令相機赴援該大臣務當振刷精神策勵將士毋再玩延致干重罪將此由六百里加緊諭令知之○庚寅諭內閣見在軍務未竣所有續撥軍餉自應寬爲籌備著宗人府御前大臣大學士軍機大臣會同戶部詳議具奏○賽尙阿程喬采奏賊踞郴州後嚴飭各軍分投截剿雖屢經獲勝尙未挫其兇鋒見在逆匪大夥及各逆首仍踞郴州永興甯安仁各土匪勾合起應並聞賊中有將由衡州直撲長沙荊州之謠州縣官民練勇一聞賊至立時奔潰以致所在城池失陷賊氛愈熾各處土匪勾連愈眾和春等大軍與賊大夥相持恐賊故分其勢希圖掣我兵力更滋猖獗殊於大局攸關未敢輕動安仁城池見已收復其永興之賊分踞已眾總兵常祿一軍兵力尙單不敷攻剿臣等飭令參將德亮

將所帶張國樑等提勇四千餘名歸其調遣以期併力進攻惟安仁之匪又已前竄攸縣醴陵各地方該處與江西吉安袁州所屬在在毗連節經臣等飛咨江西撫臣飭吉安袁州等府嚴密籌防又咨閩省督撫將所調福建官兵三千飭令取道江西來楚儻賊竄江西境內即可迎頭堵擊刻下郴州大夥賊勢未衰廣東韶州府屬仁化縣本月初間又突有匪徒千餘聲言欲由樂昌九峰等處竄赴桂陽州一帶臣等飛咨廣東督撫臣飭屬嚴行堵截並經和春分兵暫紮興甯亦可兼顧東面惟和春大軍所紮獅子嶺偏屬西南見在軍情應以東北堵截尤爲緊要臣等飛函飭令量由東北移紮適接和春稟二十日移營至黃泥坳二十一日大雨未經出隊湖南貴州官兵楚勇並守備米興朝等楚勇共五千名於二十二日冒雨拔營抵臥鳥坪派知府朱啟仁帶潮勇在於該處

紮住係賊東路和春仍督兵勇前行至陳家樓安營係郴州東北賊之前路並畱總兵王錦繡帶領雲南官兵廣西提標勇丁仍紮塘昌埠當賊西路總兵經文岱清保帶雲南兵勇及江西兵當賊南路卽日相機合力進剿其陳家樓地方並查有小道可通永興如賊全竄仍可繞出攔截等語臣等仍飭迅速合力進攻卽將該總兵布置情形徧飭總兵常祿王家琳副將鄧紹良及咨明撫臣駱秉章羅繞典查照並令常祿等乘賊勢斷力分率同德亮等銳速進攻永興之賊令王家琳將所帶河南新兵暫紮安仁毋任前竄攸醴之賊復回占踞兼防永興之賊被擊前竄極力攔擊復催鄧紹良帶兵將攸醴之賊趕緊追擊乘勢掃除並由衡州撥出苗兵一千協同防剿一面咨撫臣等由省派撥新到陝西兵千名從醴陵等處迎出與鄧紹良之兵合力探蹤堵截似此四面兜圍已

將郴州永興及前竄攸醴之賊層層截斷或冀諸軍齊力一鼓奏功臣等嚴鎮衡州扼要居中調度署桂陽直隸州知州李啟詔帶勇擊賊力盡投水身死署郴州直隸州知州孫恩保擊賊被戕遇害甚烈江華縣教諭歐陽復被執不屈遇害請旨交部從優議卹並於各任所原籍祠祀其餘在城文武統俟查明分別辦理至賊踞朱家灣山頂各路兵勇奮力搶上追擊鈔殺獨雲南兵勇追至山下殊屬怯懦該統兵官總兵經文岱由臣賽尙阿摘去頂帶其督兵不力之雲貴督標右營遊擊呂盛元直隸遊擊白人鵬卽由總兵和春摘去頂帶以示薄懲又奏據撫臣駱秉章羅繞典提督鮑起豹咨賊偏省城在金盆嶺接仗之陝西兵丁被賊衝散賊赴南門一帶圍城除一面嚴飭兵勇防堵外飛咨速派重兵來省救援臣等當卽專弁持令飛咨鄧紹良楚兵及前由衡州派赴長沙

之委員賈亨晉所帶苗兵各千名又收復安仁暫紮該縣之總兵王家琳所帶河南官兵千名由水陸星馳赴援並飛札見隨常祿攻打永興之副將瞿騰龍所帶苗兵千名亦卽由永興赴省救應另飭該副將單騎或帶精銳迅速兼程由間道星馳晉省以資守禦一面飛飭和春常祿等確查郴州大夥及永興分踞賊勢酌量分兵赴援上諭該匪自踞郴州後經該大臣嚴飭諸軍分投合擊雖屢獲勝仗斃賊多名而夥匪仍分竄永興安仁攸縣醴陵等處復敢由間道直撲長沙省垣該大臣見已飛催鄧紹良所帶楚兵一千名及委員賈亨晉副將瞿騰龍所帶苗兵各一千名總兵王家琳所帶河南兵一千名星馳赴援並飛飭攻剿郴州永興之總兵和春常祿等分兵星速赴省策應此時想已到齊卽著該大臣督飭帶兵大員與長沙城內外兵勇合力夾擊賊夥雖多大抵

煽惑土匪裹脅窮民諒此烏合之眾一經痛剿卽當潰散不但省圍可解並可盡掃賊氛儻帶兵各員遷延觀望畏葸不前卽著立正典刑毋稍姑息○諭軍機大臣等本日據賽尙阿程喬采馳奏逆匪仍踞郴州分竄永興安仁攸縣醴陵見在逐日進攻分投堵剿各摺片賽尙阿等近日辦理事務諸多遲緩該大臣等歷次奏報或稱調兵未齊或稱臨敵遇雨皆係據各路稟報藉詞搪塞見在賊踞郴州分擾各縣直逼省垣勢甚剽急而我兵遷延渙散卽尾追亦不能盡力所陳合力進剿分路堵截之處亦恐全無把握昨已降旨摘去翎頂稍示薄懲該大臣等務當振刷精神激勵將弁奮勇圖功以贖前罪斷不可任聽各營飾詞稟報再誤事機據稱雲南兵勇臨陣怯懦已將統兵之總兵經文岱遊擊呂盛元白人鵬摘頂示懲仍著嚴查該鎮將等如係有心退避卽行嚴參已

革湖南提督余萬清前於五月二十三日降旨革職拏問交程喬采嚴審定擬復於六月十七日令賽尙阿會同審辦迄今日久並未奏到此等情節一經查訊何難定讞乃亦如此延緩軍律何由整頓耶著卽將此案迅速定擬並將革職拏問之總兵劉長清一併訊擬具奏將此由六百里各諭令知之○諭賽尙阿程喬采奏桂陽縣稟報廣東韶州府屬仁化縣七月初間突有匪徒千餘聲言欲由樂昌九峰等處竄赴湖南桂陽州一帶已飛咨廣東嚴防等語前據葉名琛奏稱湖南道州逆匪竄出分擾逼近廣東交界當經諭令酌帶將弁兵勇赴連州一帶扼要防剿計柏貴奉到前旨亦卽馳回廣東矣見復據賽尙阿等稱有粵匪欲竄桂陽之信恐與道州竄出逆匪勾結爲患著葉名琛仍遵前旨迅速帶兵馳赴楚粵交界地方扼要堵剿務將粵匪餘孽悉數殄滅以期全境

肅清並嚴防楚匪紛竄且與廣西聲息相通隨時咨會勞崇光妥爲布置徐廣縉不日到楚勦辦諒能得手如須夾攻該署督卽督兵越境協擊軍營情形旦夕不同勢難遙度惟在相機籌辦合力同心不分畛域速蕩賊氛以慰廑念將此由六百里諭令知之○予湖南殉難知州李啟詔等祭葬世職○辛卯諭內閣御史范承典奏請嚴查京師保甲以弭盜賊一摺前因園汛地方有一夜連劫重案當經降旨將該管營汛等官摘去頂帶嚴加議處京師園汛重地理應肅清該員弁等如果認真巡緝何至匪徒糾夥連劫拒捕傷人且當朕還宮已傳三籌之後街道官兵星羅碁布竟至任賊遠颺殊出情理之外著步軍統領衙門順天府五城一體迅速嚴拏務獲盡法懲辦毋使一名漏網仍將見在管理地面應如何稽查巡緝分別勸懲之處會同妥議章程詳細具奏至畿南各

省近日連劫拒捕之案層見疊出地方官以緝捕爲具文該督撫亦僅以一參了事所謂聯莊會哨其效安在耶編查保甲實爲弭盜良法上年曾經通諭各省一律奉行著各該督撫嚴飭所屬平時於賊匪往來及窩藏處所務當實力訪拏一遇搶劫重案迅速掩捕毋得藉詞報勘遷延時日致賊遠逸經此次諄諭之後若再視爲具文緝捕不力惟該地方大吏是問懷之將此通諭知之○調任湖南巡撫張亮基奏臣於七月二十八日自常德府水路起程三十日舟次沅江縣探悉賊已由攸縣醴陵北竄直撲長沙驛路不能前進查沅江縣距省將及三百里之遙旱路更爲迂緩臣隻身在途隨帶兵勇不過十人貿貿前往殊屬無益因念常德一郡係咽喉重地久爲賊所覬覦刻下無兵無餉防守甚爲單薄於此城暫行駐紮既可豫備防堵又可催集兵練爲省城援應前在

辰州接准督臣程喬采函稱賊勢北竄極爲猖獗當卽札調辰沅道所屬土兵千名令其剋日赴省聽用欽差大臣前次所調黔兵千名見在銅仁松桃兩營四百名甫到臣卽令暫駐常德藉助聲威擬俟未到之黔兵六百名及土兵催齊酌留常德防堵外卽分起帶領馳赴長沙知會城中派出精兵合力夾擊又奏楚南當有事之際幹練人員俱經派居要地驅策乏人查有雲南糧儲道崔光笏辦事結實最爲可靠貴州黎平府知府胡林翼才識出眾且係湖南益陽人辦理堅壁清野事宜可以聯絡紳民因地制宜湖北黃州府知府徐豐玉循聲卓著才具素優俱係臣所深知合無懇恩俯念軍務喫緊需才孔亟准令該員等來楚聽候差遣上諭逆匪竄撲長沙省垣經羅繞典鮑起豹駱秉章等協力防守並經賽尙阿奏督飭帶兵鎮將迅速赴援昨復令湖北提督博勒恭

武由岳州帶兵接應見在張亮基業已行抵常德府城復調辰沅道所屬土兵一千名鎮守鎮兵八百名並前調之貴州兵一千名合力進剿著該撫卽親督將弁與省城派出兵勇內外夾擊痛加剿洗此時徐廣楨計可抵楚續調各省勁兵均可陸續馳到足資攻剿該撫等惟當同心勦力迅殄妖氛以綏疆圉○諭張亮基奏請調道府各員赴湖南差遣等語雲南糧儲道崔光笏貴州黎平府知府胡林翼湖北黃州府知府徐豐玉均著准其調赴湖南以資差委俟軍務告竣再行飭令回任○諭軍機大臣等張亮基奏途次聞警趕調兵練設法堵剿一摺逆匪竄逼省城情形危急據賽尙阿奏稱飛飭將弁兵勇前往應援昨又諭令湖北提督博勒恭武由岳州就近帶兵接應此時諒俱趕到該撫見抵常德去省較近自應趕調官兵及前調之貴州兵親督將弁馳赴長沙會同

各路援兵與城中合力夾擊迅解省城之圍萬不可株守一隅致誤事機逆匪自入楚境後煽結土匪竄擾各處冀以牽掣我師而其大股及著名首逆仍踞郴州永興一帶該撫俟省城解圍後督帶精兵或扼要堵剿截其來往竄擾之路或徑赴郴州相機圍攻爲擣穴擒渠之計前已諭令徐廣縉統帶廣東得勝官兵馳赴湖南督辦軍務計不日即可抵楚該撫統轄全省責無旁貸務當和衷商榷統籌全局併力進剿以期迅掃賊氛勿負委任將此由六百里諭令知之○壬辰諭內閣戶部奏廣西兵勇到營並截支軍餉員弁兵勇數目日期請飭迅速咨報一摺著兩廣總督廣西巡撫卽飭承辦各員按照該部前後指詢情節迅卽查明分別奏咨報部以備稽覈毋再延宕其湖南軍營及鄰省防堵一切支銷款日均著各督撫隨時報部以期覈實而杜冒濫○羅繞典鮑起豹

駱秉章奏賊連日用槍礮轟擊西南城角一帶臣等竭力防守初四日飭川兵川勇下城攻擊斃匪多名見在該匪於金雞橋水道開挖意欲傾陷城池復經臣等豫將火桶安入轟壞數人誠恐該匪詭計多端省城水道甚多難保不舍此趨彼雖據原派防石馬鋪之西鳳營參將閻應敏平涼營遊擊張文行會稟招回兵丁百四十七名又漢中營鎮標遊擊劉宗勝冊報招回弁兵七十七員名而陝安鎮福誠潼關協副將尹培立等及其餘兵丁尙無下落又派防金盆嶺之沅州協副將朱瀚等所帶九谿等營官兵除陸續報到外合之原存官兵僅止三千有奇竇尙阿所派援兵僅到鄧紹良管帶之九百名餘尙未到新任撫臣張亮基距省僅百餘里省中居民聞有救援人心稍定賊勢仍屬披猖臣等力保危城斷不致稍有疏失 上諭逆匪自竄長沙以後連日撲城八月初

四日飭川兵川勇下城攻擊斃賊多名奪獲槍礮黃旗多件生擒長髮二賊並善化縣知縣王葆生所募四川壯勇協同營兵出城殺賊無數奪獲器械甚多該匪於金雞橋開挖水道亦被我兵用火桶轟散見據賽尙阿程喬采已將派防安仁之河北鎮所帶河南官兵鳳凰廳同知賈亨晉所帶畱衡土兵副將鄧紹良所帶楚兵副將瞿騰龍所帶土兵並張亮基添調鎮筸鎮辰沅道所屬暨貴州調到之兵約計不下七八千名分投趕赴省城與長沙城內外見存兵勇合力夾攻足資剿洗該撫等惟當督飭所屬官紳兵民勦力同心相機痛剿不但城圍立解並可掃蕩賊氛勉之望之○諭見在湖南軍務未竣地方間被賊擾朕每披章奏念吾民流離顛沛深堪憫惻所有湖南被賊各地方應徵本年地丁錢糧著該督撫迅卽確切查明分別奏請恩施以慰廑念○諭常大澂奏

湖北省被淹被旱各州縣見飭查勘等語據稱本年江漢泛漲更兼山水斗發以致公安沔陽石首天門等州縣田地被淹民隄漫缺又江夏漢陽等縣雨澤稀少高田被旱見經該撫派員查勘著卽分飭該管道府及委員等確切查明有應行緩徵之處據實具奏○諭軍機大臣等羅繞典等馳奏賊匪圍攻省城兵勇疊獲勝仗一摺該匪等連日用槍礮轟擊西南城角一帶經在事文武竭力防守屢遣兵勇出城殺斃賊匪多名該匪於金雞橋開挖水道意欲傾陷城池復經該撫等豫安火桶轟散布置均尙周妥惟據稱招回陝西及沅州等營兵丁並原存官兵僅三千有奇竇尙阿等所派援兵僅到鄧紹良管帶之兵九百名其餘尙未到省我兵雖疊次獲勝而賊勢仍屬披猖省垣重地豈容稍有疏虞自應趕緊設法痛剿以解危急著賽尙阿等飛催前派援省官兵星速前

赴長沙合力夾擊毋得稍有遲誤張亮基見抵常德距省不遠著
卽迅帶調到各兵赴省救援相機痛剿省城內外聲勢日壯賊匪
自易剿除其郴州永興一帶賊夥賽尙阿等仍當嚴扼要隘截其
北竄之路務使城圍早解毋任滋蔓難圖陝安鎮總兵福誠潼關
協副將尹培立係帶兵大員何以均無下落是否遇賊退避以致
兵丁潰散其接仗之時首先退縮之弁兵均著確切查明參奏懲
辦徐廣縉計日亦可抵楚該大臣等軍威旣振賞罰嚴明諒此醜
類不難立就殲除也將此由六百里各諭令知之○癸巳諭軍機
大臣等本年江浙漕船遲誤前已諭令陸建瀛體察情形酌定辦
法一面知照漕河地方各督撫趕緊照辦毋得再有異議茲據奏
稱浙漕首幫旣未渡黃後幫亦無過蘇確信見已節逾秋分水日
消涸誠恐節節阻滯卽極力催趲北上亦恐徒託空言應如何變

通辦理之處著該督仍遵前旨迅速酌量妥辦總期於公事有濟
不可再涉游移至浙船水手素稱兇悍著卽責成楊殿邦督飭該
管道廳各員沿途彈壓以免滋事將此諭知陸建瀛並諭令楊殿
邦知之○諭張亮基奏省城被圍緊急請添兵籌餉並於要路設
防一摺常郡衝要固不可無兵防堵據該撫已將黔省先到之銅
仁松桃兵擇要分路防守惟長沙被圍情形萬分緊要調到新兵
自應先其所急疊經降旨令徐廣縉星夜前往督辦並令湖北提
督博勒恭武就近接應昨又據賽尙阿程喬采奏飛飭將弁帶兵
赴援計各路官兵不下七八千名此時卽徐廣縉博勒恭武之兵
未能趕到而賽尙阿等所派援兵想已到齊該撫自當星馳前赴
長沙地方督飭衡州派來官兵併力夾擊迅解省城之圍以固根
本若畱守常德一帶專待遠兵何以救目前之急所請湖北貴州

各兵一千名並借撥銀十萬兩已有旨分別飭令酌派備調並諭
湖北籌款接濟矣其守備范成章外委王文保均著其暫畱湖南
差遣惟素習弁兵調度固易得力第恐親信太過稍形畸重則他
兵轉生觀望軍營帶兵此等情形亦應計及惟在知人善任駕馭
得宜自無流弊將此由六百里諭令知之○諭張亮基奏常德防
堵緊要請於湖北貴州二省各調兵一千名借撥銀十萬兩飛解
來楚以濟急需又奏請飭雲南督撫挑選大理提標精兵五百名
派委龍陵營參將章中魁管帶來楚以備調遣等語著吳文鎔吳
振械卽照所請挑兵五百名飭章中魁管帶赴楚至湖北貴州調
兵數已不少所請各續調兵一千名著常大瀄蔣爵遠酌量情形
先其所急以備調遣其借撥銀十萬兩貴州恐難濟急並著常大
瀄於湖北各款內籌解湖南應用咨部撥還無稍延緩將此由六

百里各諭令知之○調常大瀄爲山西巡撫羅繞典爲湖北巡撫

以張芾署江西巡撫

由刑部左侍郎著

○乙未羅繞典鮑起豹駱秉章奏

該匪連日攻城於南門開挖地道豫裝火藥

臣

等督飭兵勇將伊

藥桶焚燒並殺斃掘洞賊匪署四川綏定營遊擊周兆熊等直衝

賊隊兵丁接踵撲入跟追數里約斃賊三四百名我兵亦有傷亡

初五日該匪復用大礮對城轟擊將南門城垛打去數尺該匪愈

來愈眾乘勢撲城兵勇槍礮齊施時甚危急適賽尙阿程喬采飭

撥之雲南楚雄協副將鄧紹良儘先遊擊朱占鼉等統帶湖南鎮

軍等營官兵九百名先後報到臣等一面分飭官紳趕緊用石條

沙袋搶築一面飭該副將等統帶提標綏靖等標協營兵五百名

圍剿該匪亦轉身對敵我兵奮勇跟追其斃匪數十名該匪仍分

踞民房不出

臣

等趕緊於城上另築礮臺安放三千斤大礮以備

轟擊寶尙阿程喬采等所撥土兵千名亦已趕到臣等督飭文武晝夜防守兼籌度萬全再行進剿上諭內閣逆匪撲城屢被官兵擊退其鋒已挫見在各路援兵雲集和春等大兵計亦不日可到著羅繞典等迅卽會合攻剿並著張亮基督帶所調官兵速抵省城內外夾攻務將撲城各匪悉數殲除毋稍觀望延緩致誤事機○丙申向榮奏臣奉旨飭歸寶尙阿酌量札調經寶尙阿飛咨督臣徐廣縉派員署理廣西提篆照會臣立卽起程馳赴長沙省垣聽候調遣臣受恩深重心非木石豈不知感激思奮實因舊有氣痛之證時發時止兩足麻木行動仍不便利皆因幼年攻打滑縣骹受矛傷又西甯旋師途中忽染癰疾經年始愈年老衰弱瘡癰交侵以致舊疾復發步履維艱茲奉諭旨赴楚援剿惟有力疾前往誓死圖報斷不敢顧惜身軀自外生成楚省軍務正在緊急

若待督臣委員到日再行交卸起程未免耽延時日臣見將提督

印信封固就近送交撫臣勞崇光暫行接收一俟督臣委定有人

再由撫臣委員齎印送交署理臣於八月初二日交卸扶病起程

由舟前進容俟馳抵長沙謁見寶尙阿時面商一切上諭軍機

大臣等前據徐廣縉奏參向榮藉病規避當有旨將向榮革職發

往新疆效力贖罪茲據向榮奏遵旨交卸赴楚援勦並詳陳患病

情形自因該大臣參奏恐干重罪是以趕緊赴楚但未將咨請該

督代奏開缺一節聲敘仍不免藉詞巧飾朕以向榮久歷戎行屢

次優容原爲其才尙可用惟屢於軍務喫緊之時稱病遷延是以

降旨加以嚴懲該革員此次奏報是尙有愧懼之意著徐廣縉再

行察看如向榮實係感知懼力疾自效卽由該大臣奏明暫停

發遣畱於軍營差遣委用向榮前在湖南尙有勞績見當需人之

際若令置身局外於事亦屬無濟儻仍前觀望趨避並非感激思
奮就令畱楚亦難期得力卽據實奏明仍遵前旨發遣想該大臣
操縱駕馭自能仰契朕心也向榮原摺著鈔給閱看將此由四百
里諭令知之○丁酉諭內閣慶祺朱嶠奏南糧首幫抵通等語本
年南糧因截卸變價之議藉詞耽延以致首進幫船至本月十七
日甫經輓抵通壩距回空例限已甚迫促其在後各幫尙有脫空
似此節節阻滯必致有誤回空著慶祺朱嶠督飭楊村通判於軍
船到時務卽加剝濟運隨到隨收並嚴飭漕運通判及沿河員弁
上緊催趲以利轉運務期各幫漕船晝夜遄行銜尾北上毋任片
刻停畱至回空船隻著沿途各督撫嚴飭地方文武一體催令迅
速南旋毋得互相推諉再致貽誤○諭軍機大臣等徐廣縉奏暹
羅國王遣使補進例貢並請敕封見已行抵粵東等語上年暹羅

國屆當例貢之期奏請呈進曾降旨令俟請封時一併呈遞茲據該國遣使齎奉表文方物補行入貢具見恭順之忱該貢使見已抵粵著卽派委妥員伴送於本年封印前抵京其該國大庫所請將貢船先行回國修整著照所請行原貢船隨帶貨物並准照例免稅至該嗣王鄭明懇請誥命應行頒給敕書之處已飭該衙門查照舊章撰擬俟該使臣到京後照例發給齎回該署督等卽先行諭知該國嗣王可也將此諭令知之○羅繞典鮑起豹駱秉章奏連日賊眾負固不出初六日臣等飭令雲南楚雄協副將鄧紹良等統帶楚兵並撥川兵五百名川勇四百名出城直攻賊營分作兩隊後隊埋伏前隊進攻自辰至申賊始出巢前後夾擊斃賊百餘名初七初八等日復令鄧紹良等統帶土兵川兵攻打城南賊營該匪踞巢不出尙未大受懲創見在碧湘街鼓樓門西湖橋

金雞橋一帶民房均爲賊踞黨與甚夥老龍潭白沙井各處均建高臺其地若安大礮則城中殊爲可慮惟有設法先毀礮臺繼焚民房使彼無地自容又奏准新任撫臣張亮基咨見將貴州官兵四百名分派龍陽益陽該撫臣暫留常德俟四川等省官兵到齊除酌留防堵外餘均親帶赴省援剿等因查益陽龍陽常德距省稍遠且兵分則單見在省城危急萬分雖經賽尙阿程喬采先後撥兵四千餘名尙未到齊專望川黔等兵應援以期厚集兵力迅解重圍上諭該逆詭詐多端見雖踞巢不出難保非陽圍省城陰圖他竄以爲聲東擊西之計抑或候大夥匪眾續到再圖攻撲亦未可定著羅繞典等密派得力弁兵詳細偵探應如何斷其接應防其逃竄相機籌辦毋稍大意賽尙阿等所派援兵惟鄧紹良已抵長沙屢獲勝仗此外如副將瞿騰龍所帶土兵河北鎮王家

琳所帶河南官兵鳳凰廳同知賈亨晉所帶畱衡土兵見在是否
均經到齊衡州距長沙三百餘里何以派出帶兵各員如此遷延
著賽尙阿等確切查明儻係畏賊退縮藉詞逗遛卽著一面奏聞
一面以軍法從事毋稍寬縱張亮基職任封疆責無旁貸不特鎮
筭辰沅等處官兵可供調遣卽欽差軍營兵勇亦可咨調撥用況
衡州已派援兵該撫自當前赴長沙就近督率若株守常德又將
調到各兵截畱省城設有疏虞該撫豈能辭咎著懷遵前旨卽帶
見調官兵星速赴援內外夾擊迅掃賊氛而靖疆圉毋負委任至
總兵福誠副將尹培立等前於長沙城外遇賊兵潰該總兵等何
以尙無下落是否臨陣退避該撫等仍確查據實參辦將此由六
百里諭令知之○戊戌以載堪爲內閣學士由正黃旗蒙古副都統遷○辛丑
賽尙阿程喬采奏據總兵和春常祿等稟郴州大夥尙踞州城永

興亦尙有賊踞臣等以省城緊要飛飭總兵王家琳副將鄧紹良
瞿騰龍鳳凰廳同知賈亨晉等統帶楚豫官兵及苗兵其四千餘
名前往又於衡州防兵內續行抽撥楚粵官兵七百餘名交侍衛
開隆阿副將巴圖帶領星馳赴省援剿和春接到臣等照會及省
城飛咨亦卽選帶兵勇二千餘名取道耒陽衡州赴省救援與瞿
騰龍所帶苗兵均先後過衡星馳前進瞿騰龍簡率精銳苗兵數
十人先行倍道已與鄧紹良賈亨晉等兵前後馳抵省垣前據和
春稟報移營紮定陳家樓後據郴州本地紳民暨各營探報洪秀
泉見居城內州衙楊秀青見居考棚各有打手數百防護和春當
於朱木山築立新營七月二十六日賊分兩股來撲每股約二千
餘人總兵秦定三李瑞知府江忠源各帶兵勇迎擊和春復令仁
勇於隔河處所涉水截擊先後斃賊四百餘名次日進攻賊壘復

斃賊數十名又據常祿等稟常祿由永興移營進紮小平沖該處距永興縣城十里有餘距賊營亦四五里一路茶山蹊徑叢雜難以進兵適德亮帶領張國樑等潮捷各勇四千餘名分兩路進紮常祿親率弁兵繞出賊營左近查看距靈龍橋二里許賊營三處勢相犄角移營攔擊會合張國樑等進攻復殺賊數百名並將賊營焚燬惟賊勢聯絡人數比前較多當飭捷勇等營另行設法進攻臣等確探逆首大夥尚在郴州永興之賊分踞亦眾勢不能不通盤計畫惟長沙爲南省會垣必應極力赴援當卽夤夜檄催諸軍星馳前往計由衡撥出並和春等帶來兵勇合之省城存兵已有萬餘卽日和春等兵到齊合力剿擊當可無虞見在廣西提督向榮經臣賽尙阿檄調到衡臣已令赴長沙將四川河南陝西等處官兵交其統領與和春等同心勦力奮勉圖功臣程喬采已札

令四川續到新兵行抵荊州等處卽繞道赴岳州迎剿以防賊匪
北竄江漢之路臣賽尙阿先已咨行福建督撫臣將閩省新兵取
道江西來楚如賊竄至吉袁等屬卽可攔頭迎剿惟郴州兵勇分
布已單經和春分兵赴援省城兵力更虞不足廣東仁化匪徒擾
及樂昌見屯乳源縣坪溪等處恐竄越楚境與郴州逆匪串合永
興之賊較前轉多非但土匪附從難保郴州之賊不因和春分兵
潛由小路分赴永興救應臣等見飭李瑞常祿等極力嚴堵並密
令不時偵探如郴州之賊又赴永興卽飭常祿等兵一面進攻永
興以分賊勢一面乘郴州賊少出其不意會合進剿臣等仍駐衡
州調度又奏據調任湖南巡撫張亮基咨該撫臣行抵沅江縣距
省三百里聞賊偏省城不能前進折回常德適值貴州銅仁松桃
營兵四百名到郡該撫臣奏明截畱分防查常德府城距省西偏

尙數百里見在賊逼省城正望新兵厚集援剿所有貴州新兵千名自應由該郡星速晉省斷難令在常郡駐防請旨飭令該撫臣務將前項新兵卽行帶領由常赴省會剿又據湖北撫臣常大淳咨見已奏明賊情緊急請將南省軍營所調湖北官兵剋日撥回調遣查湖北官兵正在軍前剿賊喫緊之際應請毋庸撤回至江西吉安袁州等屬本與長沙接壤該省額兵較少已由臣等將九江鎮總兵清保所帶兵千名由郴州南路調回飭由醴陵萍鄉一路交界相機堵禦其九江鎮後營遊擊長春所帶兵千名見在長沙守城臣賽尙阿亦屬向榮等到省後酌量情形如有他省官兵可以更替亦卽令其撤回以資防守又奏查四川提督蘇布通阿年富力強向榮深悉其能茲當軍前需人之際合無仰懇飭下該提督由川省馳赴湖南軍營以資臂使 上諭內閣長沙被圍節

經降旨令賽尙阿等赴援昨又諭令張亮基由常德馳赴省垣當
此大兵雲集急宜內外夾擊著賽尙阿卽馳赴省城督率各路官
兵與羅繞典鮑起豹駱秉章等協同剿辦務期迅解省圍埽除羣
醜向榮前因稱病遷延降旨革職發遣茲據賽尙阿奏稱前經檄
調向榮由粵赴楚見已馳抵衡州飭令統兵卽赴長沙應援該革
員此次遵調來楚尙爲迅速著暫緩發遣卽令統帶四川河南等
處官兵奮勉剿賊戴罪圖功以觀後效其郴州永興等處賊匪仍
嚴飭帶兵鎮將分路攻剿毋任竄逸○諭軍機大臣等賽尙阿程
喬采奏逆匪竄撲省城內守外援並督兵分剿郴州永興賊匪一
摺逆匪竄撲長沙前據羅繞典等奏約有萬人大股在後自係約
略偵探之詞茲據賽尙阿等奏逆首洪秀泉楊秀青等均仍在郴
州城內並分踞永興縣城其直撲省城之賊係逆匪羅亞旺帶領

長髮賊七百餘人及土匪三千餘人是大股逆匪尙在郴州永興分股撲省安知非牽率官兵大隊馳救省城陰圖竄擾他處爲聲東擊西之計見在各路援兵陸續到省賊匪僅偏南門並未四面圍攻張亮基何以行抵常德輒將新調之兵分撥截畱遷延不進疊經降旨嚴飭該撫帶兵赴援並令湖北提督博勒恭武由岳州赴長沙援剿向榮和春等見又先後抵省是省城兵力厚集數倍於賊警羅繞典張亮基駱秉章會同鮑起豹博勒恭武向榮和春等迅飭各路兵勇分投布置務將撲城股匪全數殲除毋得觀望延緩任令旁竄以解圍爲塞責至郴州永興之賊前據賽尙阿等奏已飭和春大軍移至陳家樓安營可將郴州永興大路截斷以尾追之兵改爲迎頭截擊等語逆匪見在分踞別竄自應從中路截斷使賊首尾不能救應但何以郴州永興兩處俱報小有勝仗

仍稱賊營聲勢甚爲聯絡又稱賊中人數比前較多是所報獲勝情形尙恐不實不盡賊勢仍向北竄未見能迎頭截擊此中調度布置宜有把握切勿僅據稟報飾詞又墮賊匪奸計見在郴州永興及長沙城外之賊若能相機衝截使其不至會合勦辦更可得手逆匪入楚後附從土匪雖多皆係烏合之眾其原自粵來慣能抗拒之悍賊總計不過數千如將大股逆匪痛剿其餘脅從自然瓦解衡州見有程喬采督兵防守賽尙阿自應統兵赴省就近調度惟據稱賊匪大股尙踞郴州永興兩處目下情形亦難懸揣仍著通盤籌畫勿誤事機至請將貴州新兵一千名及四川軍餉十萬兩分別督催赴省解衡及湖北官兵毋庸撤回江西官兵酌量調回防堵之處均著賽尙阿酌量緩急分別辦理可也將此由六百里各諭令知之○署江西巡撫陸元烺奏楚氛不靖派兵前赴

吉安袁州二府防堵得旨嚴密防堵勿許闌入○命四川提督蘇布通阿馳赴湖南軍營聽候調遣○壬寅諭內閣奕山布彥泰德齡特克星額桂齡奏賊匪復入卡滋擾經官兵擊敗逃遁各一摺據稱夷匪鐵完庫里霍卓與倭里罕霍卓在喀什噶爾卡外阿克薩伊地方會合並有賊目克奇克霍卓卡提條列霍卓依善罕等由霍罕逃出同聚一處於七月十一日夜竄至小阿爾吐什莊滋擾經特克星額等先期準備並派阿奇木伯克邁瑪特撫諭回莊桂齡帶兵防剿飭令委營長奇車布吉新布遊擊勒豐額等併力攻擊賊不能支出卡逃竄拏獲賊匪多名奪獲器械多件見仍嚴防等語夷匪屢次入卡滋擾特克星額區畫得宜並能撫綏回眾不至煽惑桂齡督率將弁奮勇擊賊調度有方均堪嘉尚特克星額桂齡著加恩各賞給白玉翎管一支白玉搬指一箇仍俱交部

從優議敘其在事出力之將弁兵丁及伯克等著查明據實保奏
候朕施恩毋許冒濫所有拏獲賊犯著仍解交德齡嚴行審訊定
擬具奏○癸卯諭內閣王懿德奏福州等府屬於五六月間疊被
狂風大雨溪湖漲發以致漫溢城鄉各處其漳州府屬之平和縣
被水最重淹斃男婦一百餘名民房亦多坍塌雲霄長泰等各廳
縣亦有淹斃人口均經地方官捐廉撫恤著該撫再行派委委員
分赴各該處認真查勘被水輕重情形加意安撫毋令一夫失所
其鹽場營船及龍溪南靖等處隄岸應如何修整之處一併確查
分別辦理○甲辰諭內閣常大瀄奏請免商販米稅等語所有四
川江西二省商販米船運往湖北荊州武昌漢陽等府售糶經過
各關均著暫免米稅俟軍務完竣再行照常徵收○程喬采奏探
聞郴州大股逆匪聞長沙賊匪疊次被創已於十一十二等日由

小路分逃自係竄往省城經總兵李瑞等分帶兵勇緊接跟追該逆竄往永興臣等已飭常祿等趕緊力籌堵剿又奏臣思逆匪竄偏長沙岳州緊在下游情形喫重一經大兵圍剿向北狂奔不但岳州正當其衝卽北省亦必震動署提臣雙福見經到楚自應趕緊接篆卽令坐鎮武昌博勒恭武仍行駐紮岳州庶兩處俱有大員駐守防禦益臻慎密上諭軍機大臣等逆匪由郴州永興北竄長沙中間尚有攸縣安仁醴陵等處賊匪脅從雖眾未必能由郴州至長沙處處聯絡必須從中路衝截使其不能會合以遏其勢見雖有和春等大兵在前李瑞等跟蹤於後若未能扼要布置必致大股逆匪直竄醴陵不但爲長沙撲城股匪助勢安知不由瀏陽平江北窺湖北且可分竄江西總由大營將驕卒玩已成錮習兵勇雖眾調遣不靈輒墮奸計試問賊匪全股越過衡郡而北

勢若燎原誰執其咎耶長沙援兵計已雲集本日據張亮基奏已帶兵八百名赴省博勒恭武前飭赴援長沙據常大瀄奏畱該提督仍駐岳州杜賊北竄以見在情形而論自以控扼岳州爲要但亦須於平江一帶擇要紮營使賊不能由陸路竄赴通城崇陽水陸兼扼更爲周密至長沙城外之賊屢被剿敗負固不出自因官兵勢盛待後路賊匪救援或圖會合他竄羅繞典張亮基等亟應乘賊勢分力薄之時出奇制勝激勵各路兵勇將城外賊營痛加剿洗切勿坐視株守失此機會至兵精緊要已飭部會議籌撥據程喬采奏軍餉支發章程亦交部速議粵西開銷過於浮冒豈可再蹈前轍著該督督率糧臺大員查照成例酌量樽節動用並按月分晰報部以杜冒濫湖北商販米船准其過關免稅兩湖係產米之區如何互相接濟著隨時咨商辦理至各路運解兵餉紛紛

截留儻糧臺支應偶有不敷或官給印票暫向商棧通融及殷富紳民暫那濟用俟續撥餉銀到日照數給還總期設法接濟毋誤軍需再本日據陸元烺奏江西盤獲逆夥張二據供逆匪欲分股竄往江西並竄回廣西自係煽布流言虛張聲勢但既有此犯供亦不可不嚴加防範並按查奸細毋使溷迹句串將此由六百里諭知賽尚阿程爾采羅繞典張亮基鮑起豹駱秉章並諭令和春傳諭向榮知之○諭據陸元烺奏江西需兵甚急就近調撥閩浙精兵堵剿一摺另片奏拏獲廣西逆夥並堵拏瀏陽土匪等語江西南昌袁州吉安南贛各屬州縣界連楚粵見在湖南瀏陽廣東仁化翁源等縣據探各有土匪聚眾滋事江西邊境自宜扼要嚴防以備迎擊前有旨令於江蘇安徽兩省選調精兵二千名馳赴江西茲據陸元烺奏蘇省相距較遠兵到緩不濟急著准其於福

建汀州浙江衢州兩鎮營內就近各調精兵一千名由各該督撫
迅派得力將弁飭令管帶迅速馳赴江西交張芾會同在籍尙書
陳孚恩布政使陸元烺酌量分撥防守務須督飭地方文武各員
嚴密巡防毋令賊匪溷冒闖入境內湖南軍營前調福建精兵三
千名經賽尙阿奏令由江西行走如已行抵江西著張芾等酌量
緩急截畱備用所請於藩庫正雜各款下再畱銀十萬兩以濟急
需著照所議辦理至拏獲逆夥張二所供欲投義勇張家祥等詞
斷難憑信且奸匪窺探鄰境亦恐不止該犯一人江西萍鄉與湖
南醴陵一徑相通所獲瀏陽土匪柳明華等犯或卽有廣西會匪
在內主謀必當嚴密審究飛咨各處一體查拏仍須撫輯居民示
以鎮靜勿致驚疑遷徙將此由五百里諭知張芾並諭令陳孚恩
陸元烺知之○諭程喬采奏楚省軍務支發章程未便照粵西辦

理見在力求覈減一摺據稱查覈廣西省支發章程凡屬鹽糧銀數無不例外加增並有增至數倍者兵丁鹽米口糧每名日給銀米之數已屬與例不符又每百名給長夫八十名武職副將每月支給銀兩較楚省已多寡不同復有長夫五十餘名其餘各官亦俱類此甚至雇募壯勇亦給長夫諸多浮冒等語用兵以籌餉爲最要若於例外浮加伊於胡底雖粵西地瘠民貧食物昂貴亦何至相去倍蓰至長夫不過爲挑運器物之用何以文員武職支給各數十名之多兵勇長夫亦漫無限制前任巡撫鄒鳴鶴督率糧臺大員專司其事何以任意開銷毫無察覈勞崇光在外勦辦匪徒糧臺非其專責無所用其回護著卽確查據實具奏並將細冊迅速咨送戶部其浮冒侵吞各員著卽嚴參毋稍含混原摺著鈔給閱看再據陸元烺密奏盤獲奸細張二供稱賊營分出夥匪兩

股一股將竄江西一股欲回粵西賊情詭譎不可不防著於毗連各要隘派委得力將弁偵緝巡防毋稍疏懈將此由六百里諭令知之○調福建浙江兵各一千名赴江西防剿○乙巳諭內閣勞崇光奏馬平縣滋事戕官土匪全股殲除一摺廣西馬平縣地方本年六月間有土匪突起滋擾戕害知縣守備當降旨令該督撫痛加勦洗茲據該撫奏稱派委副將奚應龍遊擊福謙守備馮格等帶兵分路馳往與原派之參將訥蘇肯等相機進剿並飭代理慶遠府李天鈺督率忻城土縣嚴密防截自六月二十四至七月十九日疊次追捕殲擒賊匪節次潰敗竄至小洲河地方經遷江縣知縣王鴻昌將首匪李志信卽李士榮擒獲復經署郴州府知府張其翰等拏獲爲賊主謀之來賓縣已革文生謝懷德並將戕官之兇匪馬紅萬劉四等犯截獲盡法懲辦洵足伸國法而快人

心此股賊匪殲擒殆盡仍著該撫嚴飭地方文武悉心接捕零匪務期盡絕根株毋任稍畱餘孽所有在事出力之文武員弁著該撫覈實查明酌保候朕施恩傷亡兵壯練丁著查明咨部照例議卹○諭李德奏虧空未結各案擬將延不詳揭之上司一併參處等語州縣徵存錢糧絲毫皆關國帑豈容任意延宕以致庫款虛懸山東省已參未結各案自道光二十八年至今共有十一起之多該員等既已虧缺於前仍復玩延於後一遇事故卽查鈔抵補亦屬具文據該撫奏稱見飭藩司嚴定期限督同該管道府州勒令將應交之項如數解繳儻繳不足數該管上司仍不實力催追除將虧空之員立卽嚴參外並將該道府州咨部從重議處必應如此辦理各省奏參虧空之案甚多其能愧奮完解者實屬寥寥總由該管上司不肯認真督催所致著各督撫等嚴飭所屬將虧

空各案趕緊催繳如仍延宕即將該管上司一併附參懲處○諭
李德奏伊子擊賊被害與督臣奏報情形不符請查明更正一摺
據稱伊長子湖南武岡州知州李啟詔在署桂陽直隸州知州任
內與賊迎戰手刃賊匪多名身帶重傷力竭遇害並非投水身死
等語李啟詔臨難捐軀業經降旨從優議卹其遇害情形著該部
卽行更正以昭覈實○李德奏東省兗沂曹等府南與江蘇之淮
徐西與河南之歸德西北與直隸之大名等府壤地毗連時有兇
匪結捻結幅聚眾劫掠多在鄰封犬牙相錯之地此擎彼竄爲患
已久各地方文武員弁往往心存畛域兼之兵役地保串通包庇
漏信故縱一經出境隔省兵役勢難按捕卽如江省幅首李貫五
蔡節運等疊在東省鄒城嶧費等縣抗官拒捕殺死兵役迄今未
獲此其明證見在蘭山縣匪徒張雪等拒殺把總趙大興等一案

究出幅首閻三虎等籍隸蘇省銅山邳州並東省嶧縣費縣等屬該犯等聞拏四竄若非連界各省認真協力堵緝恐日久稽誅必形滋蔓臣見飭本省各屬文武四路兜拏懸賞勒緝並將究出各犯姓名籍貫飛咨江蘇等省按名按捕相應請旨飭令江蘇河南直隸各督撫一體飭屬認真嚴拏俾免竄逸上諭軍機大臣等見在蘭山縣匪徒張雪等拒殺武弁究出幅匪閻三虎等籍隸江蘇銅山邳州並山東嶧縣費縣等屬已據李德嚴飭本省文武四路堵拏懸賞勒緝並究出各犯姓名籍貫飛咨鄰省按捕著訥爾經額陸建瀛楊文定陸應穀卽派委幹員不分畛域一體嚴緝並將前此未獲之著名幅首李貫五蔡節運等一併按名按捕務期悉數弋獲盡法懲辦毋令一名漏網原片著鈔給閱看將此各諭令知之○丙午諭內閣前據御史丁浩奏查文經係奏派辦工大

員豐工未能合龍應加懲處以昭平允等語當交怡良等查明具奏茲據怡良奏稱查文經以臬司大員經該督等奏調督工雖未經手錢糧並查無估計苛刻情事雖大工未能堵合總督河督及承辦各員均經議處該員豈能辭咎江蘇按察使見調甘肅按察使查文經著交部照例議處○丁未羅繞典鮑起豹駱秉章奏臣等連日進攻賊營該逆負固不出初十日復令雲南楚雄協副將鄧紹良等督兵進攻南城外賊營先由城左將房屋燒燬復從右拋擲火彈燒去賊哨棚數十間賊於牆孔暗放槍礮官兵亦多受傷隨卽撤回十一十二等日賊分踞高嶺遠瞰城內經我兵開礮轟斃多名時河北鎮王家琳管帶河南兵千名來省次日鄧紹良等約會王家琳分路進剿斃賊百餘名王家琳由北路小西門前進該匪半踞民房半紮山頂當卽督飭前隊拋放火罐火彈燒燬

賊住民房該匪由南路後山紛逃約斃匪二百餘人適值綏靖鎮和春鎮遠鎮秦定三等帶貴州等省弁兵先後到省和春於十五日出隊兵勇分兩隊攻打賊巢該逆負隅堅守仍由牆孔開礮回擊我兵自卯至午連開大礮打入牆內經知府江忠源管帶楚勇搶至牆邊奪獲大黃綢旗一面該匪匿而不出查該匪居高負固所恃輒牆林立剿既難於成圍焚又不能徧及我出則伏匿我歸則又攻城必須步步爲營先規地勢已商令和春於白沙井上首之蔡公墳紮營王家琳亦於小西門外紮營均屬逼近賊巢防剿均可兼顧向榮見准賽尙阿照會來省於賊情較爲熟悉容俟籌商設法圍剿風聞逆首實在郴州刻下大夥均有來省之信須於衡州安仁攸縣醴陵一帶豫爲堵截臣等亦經密咨賽尙阿程商采並兩廣督臣徐廣綰諄飭將備沿途嚴密布置以免勾結上

諭軍機大臣等長沙城外賊匪總計不過三四千人我兵勇多至數倍自應乘後隊賊眾未至以前及早勦洗據稱該匪居高負固輒牆林立聞南門外妙高峰地勢尙不甚高民屋輒牆雖然堅固豈能屹若城墉難於攻破初十一十二等日接仗僅止互相轟擊十三日分路進勦河北鎮王家琳督帶弁兵尙屬勇往而十五日春等分兩路攻打賊巢自卯至午僅十餘礮打入牆內則兵勇之距牆甚遠發礮無準已可概見獨委員江忠源管帶楚勇槍至牆邊其餘將弁兵丁何不同時搶進且賊營占地無多我軍宜各路會合四面環攻同時並舉可期一鼓殲除何得分日輪流出隊任令負隅抗拒總由官兵積久疲玩不能併力向前和春自統帶諸軍以來惟事尾追道州郴州等處任賊衝突蹂躪竟無與賊鏖戰之時賊竄後方始探聞每隔數日始拔營跟追此次帶兵援

勦若再不奮勉出力致郴州永興大夥賊匪北竄復行串合自問當得何罪見在向榮已到長沙據稱該員素悉賊情著羅繞典張亮基等卽會同籌議剋日分派諸軍會合進勦務將城外屯踞賊匪全數殲擒毋再遷延時日賽尙阿程喬采見在衡州距攸縣安仁等處近在咫尺豈得坐視賊匪竄越務卽遣派奇兵從中路攔截並飭常祿等迅速進兵夾攻使賊首尾不能兼顧仍飛咨台湧博勒恭武於荊州岳州水陸要隘及常德一帶嚴加堵截其江西與湖南交界地方一體飛咨嚴防毋任竄擾另片奏請於省城設立軍需總局著照所議辦理所有支放一切卽照程喬采所奏章程覈實樽節不准復蹈粵西前轍致滋浮冒又據蔣文慶奏安徽軍餉運至湖南首站巴陵縣交替等語著該督撫等卽派員撥兵妥速迎提慎重接護毋稍疏失蔣文慶奏片鈔給閱看將此由六

百里諭知賽尙阿程喬采羅繞典張亮基鮑起豹賂秉章並諭和
春傳諭向榮知之